



十住經

姚秦三藏法師鳩摩羅什共佛陀耶舍譯

十住經



清刻龍藏佛說法變相圖

十住經卷第一

體一

姚秦三藏法師鳩摩羅什共佛陀耶舍譯

歡喜地第一

如是我聞一時佛在他化自在天王宮摩尼寶殿上與大菩薩眾俱皆於阿耨多羅三

體一

一

三菩提不退轉從他方界俱來集會此諸菩薩一切菩薩智慧行處悉得自在諸如來智慧入處悉皆得入善能教化一切世間隨時普示神通等事於念念中皆能成辦具足一切菩薩所願於一切世一切劫一切國土常修諸菩薩行具足一切菩薩所有福德智慧而無窮盡能為一切而作饒益能到一切菩薩智慧方便彼岸能示眾生生死及涅槃門不斷一切菩薩所行善遊一切菩薩禪定解脫三昧神通明慧諸所施為善能示現一切

菩薩無作神足皆悉已得於一念頃能至十方諸佛大會勸發諮請受持法輪常以大心供養諸佛常能修習諸大菩薩所行事業其身普現無量世界其音徧聞無所不至其心通達明見三世一切菩薩所有功德具足修習如是諸菩薩摩訶薩功德無量無邊於無數劫說不可盡其名曰金剛藏菩薩摩訶薩寶藏菩薩蓮華藏菩薩德藏菩薩蓮華德藏菩薩日藏菩薩月藏菩薩淨月藏菩薩照一切世間莊嚴藏菩薩智慧照明藏菩薩妙德藏菩薩栴檀德藏菩薩華德藏菩薩優鉢羅華德藏菩薩天德藏菩薩福德藏菩薩無礙清淨智慧德藏菩薩功德藏菩薩那羅延德藏菩薩無垢藏菩薩離垢藏菩薩種種樂說莊嚴藏菩薩大光明網藏菩薩淨明威德王

藏菩薩大金山光明威德王藏菩薩一切相莊嚴淨德藏菩薩金剛炎德相莊嚴藏菩薩炎熾藏菩薩宿王光照藏菩薩虛空無礙妙音藏菩薩陀羅尼功德持一切世間願藏菩薩海莊嚴藏菩薩須彌德藏菩薩淨一切功德藏菩薩如來藏菩薩佛德藏菩薩解脫月菩薩如是等菩薩摩訶薩無量無邊不可思議不可稱說金剛藏菩薩摩訶薩而爲上首爾時金剛藏菩薩摩訶薩承佛威神入菩薩大智慧光明三昧即時十方世界於一方過十億佛土微塵數世界乃有如來名金剛藏如是次第十億佛土微塵數諸佛皆現其身名金剛藏十方世界皆亦如是同聲讚言善哉善哉金剛藏乃能入是菩薩大智慧光明三昧如是十方世界微塵數等諸佛皆同一

號加汝威神又盧舍那佛本願力故又汝有大智慧故又與一切菩薩不可思議諸佛法明所謂令入智慧地故攝一切善根故善分別選擇一切佛法故廣知諸法故決定說諸法故無分別智善分別故一切世間法不能

汙故出世間善根清淨故得不可思議智力故得一切智人智處故又得菩薩十地故如實說菩薩十地差別故分別說無漏法不著故大智慧光明善擇以自莊嚴故令入具足智門故隨所應住次第說故得無礙樂說光明故具足大無礙智地故不忘失菩提心故教化成就一切衆生性故得一切徧至決定智故又金剛藏汝當說此法門差別所謂諸佛神力故汝能堪受如來神力故自善根清淨故清淨法性性故饒益衆生性故令衆生

得清淨法身智身故於一切佛得受記故得一切世間最高大身故過一切世間道故出世間善根清淨故即時十方諸佛示金剛藏真實無上佛身與無障礙樂說之辯與善分別清淨智慧與善憶念不忘與善決定意與徧至一切智處與諸佛無壞力與諸佛無所畏不怯弱與諸佛無礙智分別諸法善開法門與一切諸佛上妙身口意所作何以故以得菩薩大智慧光明三昧法故亦是菩薩本願力故志心清淨故智慧明白故善集助道法故善修本事故能持無量念故信解清淨光明法故善得陀羅尼門無分別故以智印善印法性故爾時十方諸佛皆伸右手摩金剛藏菩薩頂金剛藏菩薩即從三昧起已告諸菩薩言諸佛子是諸菩薩事先皆善自

決定無有過無分別清淨明了廣大如法性  
 究竟如虛空徧覆一切十方諸佛世界衆生  
 爲救度一切世間爲一切諸佛神力所護何  
 以故諸菩薩摩訶薩入過去諸佛智地亦入  
 未來現在諸佛智地諸佛子何等是諸菩薩  
 摩訶薩智地諸佛子菩薩摩訶薩智地有十  
 過去未來現在諸佛已說今說當說爲是地  
 故我如是說何等爲十一名喜地二名淨地  
 三名明地四名炎地五名難勝地六名現前  
 地七名深遠行地八名不動地九名善慧地  
 十名法雲地諸佛子是十地者三世諸佛已  
 說今說當說我不見有諸佛國土不說是菩  
 薩十地者何以故此十地是菩薩最上妙道  
 最上明淨法門所謂分別十住事諸佛子是  
 事不可思議所謂菩薩摩訶薩隨順諸地智

體一

四

慧爾時金剛藏菩薩摩訶薩說諸菩薩十地  
 名已默然而住不復分別義趣爾時一切諸  
 菩薩衆聞說菩薩十地名已咸皆渴仰欲聞  
 解釋各作是念何因何緣金剛藏菩薩說菩  
 薩十地名已默然而住不更解釋時大菩薩  
 衆中有菩薩摩訶薩名解脫月知諸菩薩心  
 之所念以偈問金剛藏菩薩言  
 淨智念慧人 何故說菩薩 諸地名號已  
 默然不解釋 今諸大菩薩 心皆懷猶豫  
 何故說是名 而不演其義 大智諸菩薩  
 咸皆欲聽聞 如是諸地義 願爲分別說  
 是諸菩薩衆 清淨無瑕穢 安住堅實中  
 具足智功德 皆以恭敬心 瞻仰於仁者  
 願欲聞所說 如渴思甘露 金剛藏菩薩  
 聞說是事已 欲令大衆悅 即時說頌言

諸菩薩所行 第一難思議 分別是諸地  
諸佛之根本 微妙甚難見 非心所能及  
從佛智慧出 若聞即迷沒 持心如金剛  
深信佛智慧 以為第一妙 心無有疑難  
遠離計我心 及心所行地 如是諸菩薩  
爾乃能聽聞 寂滅無漏智 分別說甚難  
如畫於虛空 如執空中風 我念佛智慧  
第一難思議 衆生少能信 是故我默然  
解脫月菩薩聞說此已語金剛藏菩薩言佛  
子是大菩薩衆深心清淨善行菩薩道善集  
助道法善能供養恭敬諸佛於無量佛多種  
善根成就無量深厚功德離癡疑悔無有貪  
著及諸結礙深心信解安住不動於是法中  
不隨他教是故佛子當承佛力敷演此義是  
諸菩薩於是深法皆能證知時解脫月菩薩

欲重宣此義而說偈言  
願說安隱法 菩薩無上行 分別於諸地  
令智慧清淨 衆智淨無垢 安住深信解  
於諸無量佛 證知十地義  
爾時金剛藏菩薩言佛子是諸大衆雖皆清  
淨離癡疑悔於此事中不隨他教其餘樂小  
法者聞是甚深難思議事或生疑悔是人長  
夜受諸衰惱我愍此等是故默然爾時金剛  
藏菩薩欲明了此義而說偈言  
是衆雖清淨 深知離疑悔 其心已決定  
不復隨他教 無動如須彌 不亂如大海  
其如不久行 智慧未明了 隨識不隨智  
聞以生疑悔 彼將墜惡趣 愍念故不說  
解脫月菩薩言佛子願承佛力善分別此不  
可思議法佛所護念事令人易信解所以者

何善說十地義十方諸佛法應護念一切菩薩護是事故勤行精進何以故是菩薩最上所行得至一切諸佛法故譬如所有經書皆初章所攝初章為本無有一字不入初章者如是佛子十地者是一切佛法之根本菩薩具足行是十地能得一切智慧是故佛子願說此義諸佛護念加以神力令人信受不可破壞爾時解脫月菩薩欲顯此義而說偈言

善哉智慧子 清淨行具足 願說十地行  
所入十地法 具足於智慧 得以成菩提

所有十方佛 最勝人中尊 皆共護念汝  
說是十地義 十地為根本 是名智行處

亦為究竟道 佛無量法聚 譬如諸文字  
皆攝在初章 諸佛功德智 十地為根本

爾時諸菩薩一時同聲以偈請金剛藏菩薩

言

上妙智慧人 樂說無有量 德重如山王  
哀愍說十地 戒念慧清淨 說是十地義  
十力之根本 無礙智本行 戒定慧功德  
集在仁者心 憍慢諸邪見 皆悉以滅盡

是眾無疑心 惟願聞善說 譬如渴思水  
如飢思美食 如病思良醫 如蜂欲食蜜  
我等亦如是 聞甘露法味 是故曠大意

願開初地門 乃至第十地 次第為我說  
爾時釋迦牟尼佛從眉間白毫相放菩薩力  
明光炎百千阿僧祇光以為眷屬放斯光已  
普照十方諸佛世界靡不周徧三惡道苦皆  
得休息悉照十方諸佛大會說法之眾顯現  
如來不思議力是光明徧照十方諸佛大會  
諸菩薩身已於上虛空中成大光明雲臺十

方諸佛亦復如是從眉間白毫相俱放菩薩  
 力明光炎百千阿僧祇光以為眷屬普現如  
 來不思議力悉照一切諸佛大會及照娑婆  
 世界釋迦牟尼佛大眾并照金剛藏菩薩摩  
 訶薩及師子座照已於上虛空中成大光明  
 雲臺時諸大光明雲臺中諸佛神力故而說  
 偈言

無等等諸佛 功德如虛空 十力無畏等  
 最尊世間王 於釋迦佛前 而現此神力  
 以佛力開現 法王師子藏 說諸地所行  
 諸地義差別 承諸佛力說 無有能壞者  
 若人聞法寶 則為諸佛護 漸次具諸地  
 得已成佛道 若人堪任聞 雖在於大海  
 及劫盡火中 必得聞此經 若人癡疑悔  
 終不能得聞 是故今佛子 說諸地智道

入勢力觀法 次第而修行 得至於餘地  
 各得所利益 利一切世間 願說勿令斷  
 爾時金剛藏菩薩觀察十方欲令大眾增益  
 信敬而說偈言

諸佛聖主道 微妙甚難解 非思量所得  
 惟智者行處 其性從本來 寂然無生滅  
 從本以來空 滅除諸苦惱 遠離於諸趣  
 等同涅槃相 無中亦無後 非言辭所說  
 出過於三世 其相如虛空 諸佛所行處  
 清淨深寂滅 言說所難及 地行亦如是  
 說之猶尚難 何況以示人 諸佛之智慧  
 離諸心數道 不可得思議 非有陰界入  
 但以智可知 非識之所及 如空迹難說  
 何可示其相 十地義如是 非無邊心知  
 是事雖為難 發願行慈悲 漸次具諸地

非心所能及 如是諸地行 微妙甚難見  
不可以心知 當承佛力說 汝等當恭敬  
咸共一心聽 諸地相入行 修習出法門  
於無量億劫 說之不可盡 今如實略說  
其義無有餘 一心恭敬待 今承佛力說  
大音唱因喻 義名不相違 佛神力無量  
今皆在我身 我之所說者 如大海一滴  
金剛藏菩薩說此偈已告於大眾諸佛子若  
衆生厚集善根修諸善行善集助道法供養  
諸佛集諸清白法為善知識所護入深廣心  
信樂大法心多向慈悲好求佛智慧如是衆  
生乃能發阿耨多羅三藐三菩提心為得一  
切種智故為得十力故為得大無畏故為得  
具足佛法故為救一切世間故為淨大慈悲  
心故為向十方無餘無礙智故為淨一切佛

國今無餘故為於一念中知三世事故為自  
在轉大法輪廣示現佛神力故諸菩薩摩訶  
薩生如是心諸佛子是心以大悲為首智慧  
增上方便所護直心深心淳至量同佛力善  
籌量衆生力佛力趣向無礙智隨順自然智  
能受一切佛法以智慧教化廣大如法性究  
竟如虛空盡於後際諸佛子菩薩生如是心  
即時過凡夫地入菩薩位生在佛家種姓無  
可譏嫌過一切世間道入出世間道住菩薩  
法中在諸菩薩數等入三世如來種中畢定  
究竟阿耨多羅三藐三菩提菩薩住如是法  
名住歡喜地以不動法故諸佛子菩薩摩訶  
薩住是歡喜地多喜多信多清淨多踊悅多  
調柔多堪受不好鬪諍不好惱亂衆生不好  
瞋恨諸佛子諸菩薩住是歡喜地念諸佛故

生歡喜心念諸佛法故生歡喜心念諸菩薩  
摩訶薩故生歡喜心念諸菩薩所行故生歡  
喜心念諸波羅蜜清淨相故生歡喜心念諸  
菩薩與衆殊勝故生歡喜心念諸菩薩力不  
可壞故生歡喜心念諸如來教化法故生歡  
喜心念能爲利益衆生故生歡喜心念一切  
佛一切菩薩所入智慧門方便故生歡喜心  
諸佛子菩薩復作是念我轉離一切世間生  
歡喜心入一切佛平等中生歡喜心遠離一  
切凡夫地生歡喜心離一近到智慧地生歡喜心  
斷一切惡道生歡喜心與一切衆生作依止  
生歡喜心近見一切諸佛生歡喜心生諸佛  
境界生歡喜心入一切諸菩薩數生歡喜心  
我離一切驚怖毛豎等生歡喜心所以者何  
是菩薩摩訶薩得歡喜地所有諸怖畏即皆

遠離所謂不活畏惡名畏死畏墮惡道畏大  
衆威德畏離如是等一切諸畏何以故是菩  
薩離我相故尚不貪身何況所用之事是故  
無有不活畏也心不希望供養恭敬我應供  
養衆生供給所須是故無有惡名畏也離我  
見無我相故無有死畏又作是念我若死已  
生必不離諸佛菩薩是故無有墮惡道畏我  
所志樂無與等者何況有勝是故無有大衆  
威德畏也諸佛子如是菩薩離諸驚怖毛豎  
等事諸佛子是菩薩以大悲爲首深大心堅  
固轉復勤修一切善根所謂以信心增上多  
行淨心解心清淨多以信心分別起悲愍心  
成就大慈心不疲懈以慚愧莊嚴成就忍辱  
柔和敬順諸佛教法信重尊貴日夜常修善  
根無厭親近善知識常愛樂法求多聞無厭

如所聞法正觀心不貪著不求利養名聞恭敬一切資生之物心無慳悋常生實心無有厭足貪樂一切智地常欲得諸佛力無畏不共法求助諸波羅蜜法離諸諂曲如說能行常行實語不汙諸佛家不捨菩薩學戒生薩婆若心不動如大山王不樂一切世間諸事成就出世間善根集助菩提分法無有厭足常求勝中勝道諸佛子菩薩摩訶薩成就如是淨治地法名爲安住菩薩歡喜地菩薩如是安住歡喜地發諸大願生如是定心所謂我當供養一切諸佛皆無有餘一切供養之具隨意供養心解清淨發如是大願廣大如法性究竟如虛空盡未來際盡供養一切劫中所有諸佛以大供養具無有休息又一切諸佛所說經法皆悉受持攝一切諸佛阿耨

多羅三藐三菩提故一切諸佛所教化法悉皆隨順一切諸佛法皆能守護發如是大願廣大如法性究竟如虛空盡未來際盡皆守護一切劫中一切佛法無有休息又一切世界一切諸佛從兜率天來下入胎及在胎中初生時出家時成佛道時悉當勸請轉大法輪示入大涅槃我於爾時盡往供養攝法爲首三時轉故發如是大願廣大如法性究竟如虛空盡未來際盡一切劫奉迎供養一切諸佛無有休息又一切諸菩薩所行廣大高遠無量不可壞無有分別諸波羅蜜所攝諸地所淨生諸助道法有相無相道有成有壞一切菩薩所行諸地道及諸波羅蜜本行教化令其受行心得增長發如是大願廣大如法性究竟如虛空盡未來際盡一切劫中諸

菩薩所行以法教化成就衆生無有休息又一切衆生若有色若無色若有想若無想若非有想非無想若卵生若胎生若濕生若化生三界繫入於六道在一切生處名色所攝爲教化成就一切衆生斷一切世間道令住佛法集一切智慧使無有餘發如是大願廣大如法性究竟如虛空盡未來際盡一切劫教化一切衆生無有休息又一切世間廣狹極高無量不可分別不可移動不可說麤細正住倒住首足相對平坦圓方隨入如是世間智如帝網經幻事差別如是十方世界差別皆現前知發如是大願廣大如法性究竟如虛空盡未來世盡一切劫如是世界皆現前盡知無有休息又一切佛土入一佛土一佛土入一切佛土一一佛土無量光明莊嚴

離諸垢穢具足清淨道有無量智慧衆生悉滿其中常有諸佛大神通力隨衆生心而爲示現發如是大願廣大如法性究竟如虛空盡未來際盡一切劫清淨如是國土無有休息又一切菩薩同心同學共集諸善無有怨嫉俱緣一事等心和合常不相離隨意能現佛身於自心中悉能解知諸佛神力智力常得隨意神通悉能遊行一切國土一切佛會皆現身相一切生處普生其中有如是不可思議大智慧具足菩薩行發如是大願廣大如法性究竟如虛空盡未來際盡一切劫行如是大智慧道無有休息又乘不退輪行一切菩薩道身口意業不空衆生見者即必定佛法聞我音聲即得真實智慧道有見我者心即歡喜離諸煩惱如大藥樹王爲得如是

心行諸菩薩道發如是大願廣大如法性究竟如虛空盡未來際盡一切劫行不退道所作不空無有休息又於一切世界皆得阿耨多羅三藐三菩提於一毛頭示身入胎出家坐道場成佛道轉法輪度衆生示大涅槃現諸如來大神智力隨一切衆生所應度者念中得佛道度衆生滅苦惱知一切法如涅槃相以一音聲令一切衆生皆使歡喜示大涅槃而不斷菩薩所行示衆生大智地使知一切法皆是假爲大智慧大神通自在變化故發如是大願廣大如法性究竟如虛空盡未來際盡一切劫得佛道事求大智慧大神通等無有休息諸佛子菩薩住歡喜地以上願爲首生如是等百萬阿僧祇大願以十不可盡法而生是願爲滿此願勤行精進何等

爲十一衆生不可盡二世間不可盡三虛空不可盡四法性不可盡五涅槃不可盡六佛出世不可盡七諸佛智慧不可盡八心緣不可盡九起智不可盡十世間道種法道種智慧道種不可盡如衆生盡我願乃盡如世間盡如虛空盡如法性盡如涅槃盡如佛出世盡如諸佛智慧盡如心緣盡如起智慧盡如道種盡我願乃盡而衆生實不可盡世間虛空法性涅槃佛出世諸佛智慧心緣起智道種實不可盡我是諸願福德亦不可盡諸佛子菩薩決定發是大願則得利安心柔軟心調順心善心寂滅心和潤心直心不亂心不憍心不濁心如是則成信者樂以信相分別功德信諸佛本所行道信行諸波羅蜜而得增長信善入諸地得殊勝功德信得成佛十

力信具足四無所畏信不共法不可壞信諸佛法不可思議信諸佛力無中無邊信諸如來無量行門信從因緣以成果報舉要言之信諸菩薩普行諸佛功德智慧威神力等諸佛子菩薩作是念諸佛正法如是甚深如是

離相如是寂滅如是空如是無相如是無作如是無染如是無量如是廣大如是難壞而諸凡夫心墮邪見為無明癡冥蔽其慧眼常立憍慢幢墮在渴愛網隨順諂曲常懷慳嫉而作後身生處因緣多集貪欲瞋恚愚癡起諸重業嫌恨猛風吹罪心火常令熾盛有所施作皆與顛倒相應欲流有流見流無明流相續起心意識種於三界地生苦惱芽所謂名色和合增長六入諸入與外塵相對生觸觸因緣故生諸受染樂受故生渴愛渴愛增

益故生取取增長故復起後有有因緣故有生老死憂悲苦惱如是因緣集諸苦聚眾生受諸苦惱是中無我無我所無作者無受者無知者如草木瓦石又亦如影凡夫可憊不知不覺而受苦惱菩薩於此見諸眾生不免諸苦即生大悲智慧是諸眾生我等應救又欲令住畢竟佛道之樂即生大慈智慧菩薩摩訶薩隨順如是大慈悲法以深妙心住在初地於一切物無所貪惜尊重諸佛大妙智故學行大捨即時所有可施之物盡能施與所謂穀麥庫藏金銀摩尼珠磔磔碼瑙瑠璃珊瑚琥珀珂貝瓔珞嚴身之具諸珍寶等及象馬車乘輦輦人民奴婢眷屬國土城邑聚落廬舍園林遊觀妻子男女一切所愛皆悉捨與頭目耳鼻支節手足舉身皆與深重佛

智故而不貪惜菩薩摩訶薩住於初地能行  
大捨是菩薩以大悲心大捨心救一切衆生  
故轉勤推求世間出世間利益勝事心無疲  
懈是故菩薩生無疲倦功德於諸經書能自  
開解是故生知經書功德得如是知經書智  
慧善能籌量應作不應作於上中下衆生隨  
宜而行隨有依止來親近者隨利益是故  
菩薩生世智功德得世智功德則知時知量  
慚愧莊嚴修習自利利彼之道是故則生慚  
愧功德如是功德行中精勤修行心不懈退  
體一  
是精進不退功德得力即時得堪受得力得堪  
受力已勤行供養諸佛隨佛所說如說而行  
諸佛子是菩薩悉知生起如是清淨地法所  
謂信慈悲捨不疲倦知諸經書善解世法慚  
愧堪受供養諸佛如所說行又是菩薩住

歡喜地以廣大願故見於諸佛數百數千數  
萬億那由他佛菩薩見諸佛時心大歡喜深  
心愛敬以菩薩樂具供養諸佛及供養僧以  
是福德皆回向阿耨多羅三藐三菩提是菩  
薩因供養諸佛故生教化衆生法多以二攝  
攝取衆生所謂布施愛語後二攝法但以信  
解力行未善通達是菩薩隨所供養諸佛教  
化衆生皆能受行清淨地法如是諸功德皆  
自然回向薩婆若轉益明顯堪任有用譬如  
佛子金師鍊金隨以火力調柔可用增益光  
色如是菩薩隨供養諸佛教化衆生受行清  
淨諸地之法此諸功德皆自然回向薩婆若  
轉益明顯隨意所用又諸佛子菩薩摩訶薩  
於初地中相貌得果應從諸佛菩薩善知識  
所諮受請問成初地之法不應疲厭是菩薩

住初地中應於諸佛菩薩善知識所諮受請問第二地中相貌得果無有馱足如是第三第四第五第六第七第八第九第十地中相貌得果應從諸佛菩薩善知識所諮受請問成十地法無有疲馱是菩薩悉應善知諸地逆順法善知諸地成壞善知諸地相貌因緣善知諸地得捨善知諸地清淨行分善知諸地從一地至一地行善知諸地是處非是處善知諸地轉所住處善知諸地初事後事差別善知諸地得不退轉相乃至善知一切菩薩清淨地法善知入如來智地諸佛子如是諸菩薩善知諸地相貌未發初地故乃至十地知無障礙得諸地智慧光明故能得諸佛智慧光明諸佛子如大賈主多將賈人欲至大城應先問道路退還過谷在道利害未發

初處知道宿時乃至善知到彼城事能以智慧思惟籌量具諸資用令無所乏正導人眾得至大城於險道中免諸患難身及諸人皆無憂惱諸佛子菩薩摩訶薩亦復如是住於初地而善知諸地逆順法乃至善知淨一切菩薩清淨地法善知入如來智地爾時菩薩集大福德智慧資糧為眾生意主隨宜教化令出生死險難惡處示安隱道乃至令住薩婆若智慧大城無諸憂惱是故諸佛子菩薩摩訶薩常應心不疲倦勤修諸地本行乃至善知入如來智地諸佛子是名略說菩薩摩訶薩入歡喜地門廣說則有無量百千萬億阿僧祇事菩薩摩訶薩住在此地多作閻浮提王豪貴自在常護正法能以大施攝取眾生善除眾生意貪之垢常行大施而不窮匱

所作善業若布施若愛語若利益若同事是諸福德皆不離念佛不離念法不離念諸菩薩摩訶薩伴不離念諸菩薩所行道不離念諸波羅蜜不離念十地不離念諸力無畏不共法乃至不離念具足一切種智常生是心我當於一切衆生之中為首為勝為大為妙為上為無上為導為將為帥為尊乃至於一切衆生中為依止者諸佛子菩薩摩訶薩若欲捨家勤行精進須臾之間於佛法中便能捨家妻子五欲得出家已勤行精進須臾之間得百三昧得見百佛知百佛神力能動百佛世界能飛過百佛世界能照百佛世界能教化百佛世界衆生能住壽百劫能知過去未來世各百劫事能善入百法門能變身為百於一一身能示百菩薩以為眷屬若以願

力自在示現過於此數若干百千萬億那由他不可計知爾時金剛藏菩薩摩訶薩欲重明此義而說偈言

若有諸衆生 厚修習善根 成就於白法 親近於諸佛 清淨信力大 隨順慈悲心

如是人能發 無量之佛智 諸佛一切智

無量力清淨 堪受力堅牢 成就諸佛法

悲心救世間 淨修諸佛國 敷演轉法輪

發此無上願 一念知三世 而無有別異

種種時差別 以示於世間 略說則盡求

諸佛之功德 發於廣大心 猶若如虛空

悲心智慧首 方便令修行 淨信深心故

其力無有量 心向無障礙 而不隨他教

同諸佛平等 而生於大心 諸佛子當生

如是之實心 即離凡夫行 入於佛所行

即生如來家	無有可譏嫌	則同於諸佛
必成無上道	生如是心時	即便得初地
其心不可動	猶若如山王	是菩薩便有
大喜相顯現	其心常清淨	堪受於大事
心不樂鬪訟	不好惱眾生	無有瞋恨心
樂慚愧恭敬	又習行直心	守護於諸根
常念救世間	念求諸佛智	心生於歡喜
我當得此事	得於歡喜地	即過五恐怖
不活畏死畏	及與惡名畏	三惡道怖畏
大眾威德畏	以不貪著我	及與我所故
是諸佛子等	遠離諸怖畏	常行慈悲心
恒有信恭敬	慚愧功德備	晝夜增善法
樂功德實利	不樂於諸欲	如有所聞法
能常善思惟	無有貪著行	斷諸利養心
常樂於菩提	一心求佛智	行諸波羅蜜

離於諂曲心	隨說而能行	安住實語中
不汙諸佛家	不捨菩薩學	遠世間事業
樂利於世間	求善法無厭	精進轉增益
諸菩薩如是	好樂諸功德	而發於大願
求欲見諸佛	護法至佛所	行菩薩妙行
化一切眾生	淨一切佛土	我佛國土中
滿諸大菩薩	諸菩薩同心	見聞皆不空
一切微塵中	諸佛成佛道	發於如是等
無量無邊願	是願無窮盡	如虛空眾生
法性世涅槃	諸佛出智慧	心緣起智種
我願如是住	如是發大願	心柔輒調順
能信佛功德	而觀於眾生	知從因緣起
則生慈悲心	即於苦眾生	我當救度之
為是眾生故	而行種種施	所謂妙國土
上妙諸珍寶	象馬及車乘	眷屬與人民

頭目及手足 肌肉施無悔 求種種經書  
 心無有疲倦 得解其義趣 能隨世而行  
 慚愧堪受心 漸令得增長 能以恭敬心  
 供養無量佛 智者於日夜 如是常修行  
 善根得明了 猶如成鍊金 菩薩住是地

能了知十住 展轉修行時 無有諸障礙

譬如賈客主 欲利諸賈人 先問道路中

諸險艱難事 菩薩住初地 應知諸地行

而無有障礙 能至於佛地 住是初地中

多作閻浮王 善知於諸法 常行慈悲心

如法而化導 一切皆信敬 勸令行布施

以求佛智慧 菩薩若捨國 佛法中出家

勤行於精進 即得百三昧 及見百諸佛

震動百國土 光明照百國 飛行亦如是

化百土衆生 入於百法門 念知百劫事

示現百種身 能以百菩薩 眷屬而示現  
 若以其願力 過是數無量 今明初地義  
 但以略解說 若欲廣說者 億劫不能盡  
 是初菩薩地 名之為歡喜 利益衆生者  
 今已分別說

十住經卷第一

音釋

諮 津私切 瑕 胡加切 踊 余隴切 狹 胡夾切  
 訪問也 玷也 跳躍也 胡夾切  
 輓 而充切 輦 羊諸切 輦 兩手對舉之車也

十住經卷第二

體二

姚秦三藏法師鳩摩羅什共佛陀耶舍譯

離垢地第二

一切菩薩衆 聞說上地義 其心皆清淨

歡喜無有量 各於所坐處 踊住虛空中

脫身上妙衣 以散金剛藏 咸皆稱讚言

善哉金剛藏 大智無所畏 善說菩薩地

解脫月大士 知衆心清淨 欲聞第二地

相貌之所說 即請金剛藏 大智願解說

第二地相貌 一切皆欲聞

爾時金剛藏菩薩摩訶薩語解脫月菩薩言  
佛子菩薩摩訶薩已具足初地欲得第二地  
者當生十心何等爲十一柔輦心二調和心  
三堪受心四善心五寂滅心六眞心七不雜  
心八無貪恪心九快心十大心若諸菩薩摩

訶薩已具足初地欲得二地者先當生是十  
心諸佛子菩薩欲住是離垢地從本已來離  
一切殺生捨棄刀仗無瞋恨心有慚有愧於  
一切衆生起慈悲心常求樂事尚不惡心惱  
於衆生何況麤惡離諸劫盜資生之物常自  
滿足不壞他財若物屬他所受用他所攝  
者於是物中一草一葉不與不取何況過者  
離於邪婬自足妻色不求外欲屬他女人尚  
不生心何況從事離於妄語常眞語實語諦  
語直語不作憎惡妄語乃生夢中尚不妄語  
何況故作妄語離於兩舌無破壞心此聞不  
向彼說彼聞不向此說於鬪諍離散人中常  
好和合離於惡口所有言語不麤穢苦惡令  
他瞋惱不以瞋慢令他怖畏惱熱不憂不喜  
自壞其身亦壞於他如是等語皆悉捨離所

有言說甚可喜樂美妙悅耳能化人心和柔  
具足多人愛念能令他人歡喜悅樂常出如  
是之語離於綺語常自守護所可言說應作  
不作常知時語實語利益語順法語籌量語  
不爲戲樂語乃至戲笑尚不綺語何況故作  
綺語不貪他物若有屬他他所貪著他所攝  
用不作是念我當取之離瞋害心嫌恨心迫  
熱心等常於衆生求好事心愛潤心利益心  
慈悲心離於占相習行正見決定深信罪福  
因緣離於諂曲誠信三寶生決定心菩薩如  
是常護善道作是思惟衆生墮諸惡道者皆  
由十不善道因緣我今當自住十善法亦當  
爲人說諸善法示正行處何以故若人自不  
行善爲他說法令住善者無有是處又是菩  
薩復深思惟行十不善道因緣故則墮地獄

畜生餓鬼行十善道因緣故則生人處乃至  
有頂處生又是十善道與智慧和合修行心  
劣弱者樂少功德厭畏三界大悲心薄從他  
聞法至聲聞乘復有人行是十善道不從他  
聞自然得知不能具足大悲方便而能深入  
衆因緣法至辟支佛乘復有人行是十善道  
清淨具足其心曠大無量無邊於衆生中起  
大慈悲有方便力志願堅固不捨一切衆生  
故求佛大智慧故清淨菩薩諸地故能淨諸  
波羅蜜故能入深廣大行又能清淨行是十  
善道乃至能得佛十力四無所畏四無礙智  
大慈大悲乃至具足一切種智集諸佛法是  
故我等應行十善道常求一切智慧是菩薩  
復作是思惟此十不善道上者地獄因緣中  
者畜生因緣下者餓鬼因緣於中殺生之罪

能令衆生墮於地獄畜生餓鬼道若生人中  
得二種果報一者短命二者多病劫盜之罪  
亦令衆生墮於地獄畜生餓鬼道若生人中  
得二種果報一者貧窮二者共財不得自在  
邪淫之罪亦令衆生墮於地獄畜生餓鬼道  
若生人中得二種果報一者婦不貞良二者  
得不隨意眷屬妄語之罪亦令衆生墮三惡  
道若生人中得二種果報一者多被誹謗二  
者恒爲多人所誑兩舌之罪亦令衆生墮三  
惡道若生人中得二種果報一者得弊惡眷  
屬二者得不和眷屬惡口之罪亦令衆生墮  
三惡道若生人中得二種果報一者常聞惡  
音二者所言說恒有諍訟綺語之罪亦令  
衆生墮三惡道若生人中得二種果報一者  
所有言語人不信受二者有所言說不能分

了貪欲之罪亦令衆生墮三惡道若生人中  
得二種果報一者多欲二者無有厭足瞋惱  
之罪亦令衆生墮三惡道若生人中得二種  
果報一者常爲他人求其長短二者常爲他  
所惱害邪見之罪亦令衆生墮三惡道若生  
人中得二種果報一者常生邪見之家二者  
其心諂曲諸佛子如是十不善道皆是衆苦  
大聚因緣菩薩復作是念我等何故不遠離  
是十不善道行十善道亦令他人行此善道  
如是念已即離十不善道安住十善道亦令  
他人發心住於十善道是菩薩爾時於一切  
衆生中生安隱心樂心慈心悲心憐愍心利  
益心守護心師心大師心我所有心作是念  
是諸衆生墮於邪見隨逐邪心行邪險道甚  
可憐愍我等應令是衆生住正見道如實法

中是諸衆生常共瞋恨鬪諍分別彼我我等應令是衆生在無上大慈中是諸衆生無有獸足常貪他人財物恒以邪命自活我等應令是衆生住於清淨身口意業是諸衆生隨逐貪欲瞋恚愚癡因緣常爲種種煩惱大火之所燒然不求得方便我等應令是衆生滅諸煩惱大火安置清涼之處是諸衆生常爲無明黑闇所覆入大黑闇遠離智慧光明入於生死大險道中隨逐種種邪見我等應令是衆生使得無礙清淨慧眼以是眼故知一切法如實相得不隨他教得一切如實無障礙智是諸衆生墮在生死險道中將墜地獄畜生餓鬼深坑入惡邪見網中爲種種愚癡叢林所覆隨逐虛妄邪道徑路常爲愚癡之所盲冥遠離有智導師非是出道謂爲出

要隨惡魔道隨順魔意遠離佛意我等應令是衆生度於生死險道艱難安處令住一切智人無畏大城無諸衰惱是諸衆生爲諸煩惱暴水所沒常爲欲流有流見流無明流所漂常隨生死相續不絕入大愛河爲諸煩惱勢力所食不能得求出要之道常爲欲覺瞋覺惱覺惡蟲所害又爲身見水中羅刹所執入於五欲深流洄瀆諸難之中爲喜愛淤泥之所染汙我慢墜地之所焦枯無所歸趣於十二入怨賊聚落不能得出不遇導師能正度者我等應於是衆生生大慈悲以大善根力而拔濟之得安隱處離諸驚怖隱沒住一切智慧寶洲是諸衆生深心貪著多有憂悲苦惱患難憎愛所縛欲械所繫入於三界無明稠林我等應令是衆生遠離一切三界所

著令住離相無礙涅槃是諸衆生深著我我所於五陰巢窟不能自出常隨四倒依六入空聚爲四大毒蛇之所侵害爲諸煩惱衆賊所殺受此無量諸苦惱者我等應令是衆生離一切貪著令住空無我智道所謂涅槃斷

一切障礙是諸衆生其心狹劣樂於小法遠離無上一切智慧以是貪著小乘心故不求無底大乘出法我等應令是衆生住廣大心無量無邊諸佛法中所謂無上大乘諸佛子是菩薩如是隨順持戒力善能廣生大慈悲心是菩薩住離垢地得見數百佛數千萬億那由他諸佛見諸佛已以衣被飲食卧具醫藥資生之物供養諸佛於諸佛所生恭敬心復受十善道受已乃至得阿耨多羅三藐三菩提終不中失是菩薩若干多百多千乃至

多百千萬億劫遠離慳貪破戒垢故淨修布施持戒諸佛子譬如成鍊真金在礬石中諸一切垢則盡轉復明淨菩薩亦如是住是離垢菩薩地中多百多千乃至無量百千萬劫遠離慳貪破戒垢故淨修布施持戒菩薩爾時於四攝法中愛語偏多十波羅蜜中戒波羅蜜偏勝餘波羅蜜非不修集但隨地增長諸佛子是名菩薩摩訶薩第二離垢地菩薩住是地中多作轉輪聖王爲大法王廣得法力七寶成就有力自在能除一切衆生慳貪破戒之垢以善方便令衆生住於十善道中爲大布施而不窮盡所作善業若布施若愛語若利益若同事皆不離念佛不離念法不離念諸菩薩摩訶薩伴不離念諸菩薩所行道不離念諸波羅蜜不離念十地不離念諸

力無畏不共法乃至不離念具足一切種智  
 常生是心我當於一切衆生之中爲首爲勝  
 爲大爲妙爲上爲無上爲尊爲將爲帥爲尊  
 乃至於一切衆生中爲依止者諸佛子是菩  
 薩摩訶薩若欲捨家勤行精進須臾之間於  
 佛法中便能捨家妻子五欲得出家已勤行  
 精進須臾之間得千三昧得見千佛知千佛  
 神力能動千佛世界能飛過千佛世界能照  
 千佛世界能教化千佛世界衆生能住壽千  
 劫能知過去未來世各千劫事能善入千法  
 門能變身爲千於一一身能示千菩薩以爲  
 眷屬若以願力自在示現過於此數若干百  
 千萬億那由他不可計知爾時金剛藏菩薩  
 摩訶薩欲重明此義而說偈言  
 菩薩柔輒心 調和堪受心 善心寂滅心

真心不雜心	無有貪悋心	快心與大心
得是十心已	入於第二地	菩薩住是地
成就諸功德	常離於殺生	不惱於一切
常離於劫盜	不生邪婬心	實語不兩舌
不惡口綺語	他人所有物	不生於貪心
不惱於衆生	直心行正見	無有憍慢心
亦無諂曲心	柔輒不故逸	護持諸佛教
所有劇苦惱	地獄與畜生	餓鬼熾然身
皆從惡心有	我今已永離	如是諸惡事
行於真實理	寂滅之善法	從人至有頂
所有受樂處	禪樂三乘樂	皆從十善生
如是思惟已	心常不放逸	身自持淨戒
亦教人令持	徧觀諸衆生	種種受苦惱
如是愍念已	轉生深悲心	凡夫甚可愍
墮在諸邪見	心多懷瞋恨	常好起諍訟

常樂於五欲	貪求無有狀	起三毒因緣
我應度此等	深覆愚癡闇	墜生死險道
入大邪見網	墮於世籠檻	常為諸魔賊
煩惱之所壞	此等甚可愍	我應度脫之
沒深煩惱水	四流所漂漫	具受於三界
百種諸苦毒	住五陰深巢	生我我所心
我為度此苦	當勤修行道	捨無上佛慧
生於下劣心	令住佛大智	發無量精進
菩薩住此地	集無量功德	得值遇諸佛
承事而供養	以是因緣故	善根轉明淨
猶如好真金	鍊之以礬石	佛子住此地
常作轉輪王	令諸眾生等	住於十善道
從初發心來	所修習諸福	願以救世間
令得佛十力	若欲捨王位	出家行學道
勤心行精進	得入千三昧	得見數千佛

供養聽受法	菩薩住此地	能示如是事
若以其願力	示諸神通事	度脫於眾生
過此數無量	常為諸世間	勤求好事者
具足解說此	第二地已竟	
明地第三		
諸菩薩聞是	不可思議行	心皆大歡喜
恭敬無有量	即時虛空中	雨眾名華香
如雲而垂下	供養金剛藏	咸讚言善哉
善哉金剛藏	善說諸大人	護持淨戒行
於諸眾生中	深有憐愍心	敷演解說是
第二地行處	菩薩微妙行	真實無有異
是諸菩薩等	清淨之行足	為一切眾生
常求諸好事	第二淨明地	今已解說竟
天人恭敬者	願說第三地	善示智所作
菩薩之所行	願說諸大人	云何行布施

持戒及忍辱 精進行禪定 智慧與方便  
并及慈悲心 云何行是法 清淨於佛行  
解脫月菩薩 語金剛藏言 菩薩至三地  
當以何等心

金剛藏菩薩摩訶薩語解脫月菩薩言佛子  
諸菩薩摩訶薩深淨心行第二地已欲得第  
三地當以十心得入第三地何等為十一淨  
心二猛利心三馱心四離心五不退心六堅  
心七明盛心八無足心九快心十大心諸佛  
子是菩薩摩訶薩以是十心得入第三地能  
觀一切有為法如實相所謂無常苦空無我  
不淨不久敗壞不可信相念念生滅又不生  
不滅不從前際來不去至後際現在不住菩  
薩如是觀一切有為法真實相知此諸法無  
作無起無來無去而諸衆生憂悲苦惱憎愛

所繫無有停積無定生處但為貪恚癡火所  
然增長後世苦惱火聚無有實性猶如幻化  
見如是已於一切有為法轉復歇離趣佛智  
慧是菩薩知如來智慧不可思議不可稱量  
有大勢力無能勝者無有雜相無有衰惱憂  
悲之苦能至無畏安隱大城不復轉還能救  
無量苦惱衆生如是見知佛智無量見有為  
法無量苦惱於一切衆生轉生殊勝十心何  
等為十衆生可愍孤獨無救貧窮無所依止  
三毒之火熾然不息閉在三有牢固之獄常  
體二  
住煩惱諸惡刺林無正觀力於善法中欲樂  
心薄失諸佛妙法而常隨順生死水行驚畏  
涅槃是菩薩見衆生如是多諸衰惱發大精  
進是諸衆生我應救我應解應令清淨應令  
得脫應著善處應令安住應令歡喜應知所

宜應令得度應使滅苦菩薩如是善遠離一切有爲法深念一切衆生見諸佛一切智有無量利益即時欲具佛智慧救度衆生故勤行菩薩道作是思惟以何因緣以何方便是諸衆生墮在大苦諸煩惱中當拔出之使得永住畢竟常樂即時知住無礙解脫智慧中者乃可得此是無礙智慧解脫不離通達諸法如實智無行行慧如是智慧之明從何而得當知不離多聞決定智慧復作是念無礙解脫等諸佛法以何爲本不離聞法爲本菩薩如是念已一切求法時轉加精勤日夜常樂聽法無有厭足心無休息喜法愛法依法隨法重法究竟法歸法救法隨順行法菩薩如是方便求法所有珍寶財物金銀等庫藏無所匱惜於此物中不生難想但於說法者

生難遭想爲求法故於內外物無不能捨世間所有可布施者所謂國土人民眷屬田業財物摩尼寶珠金銀庫藏象馬輦輿衆寶瓔珞諸嚴身之具妻子男女及支節手足耳目鼻舌舉身施與無所愛惜又爲求法故於說法者盡心恭敬供養給侍破除憍慢我慢大慢諸惡苦惱無理等事悉能忍受深求法故若得一句未曾聞法勝得滿三千大千世界珍寶得聞正法一偈勝得轉輪聖王釋提桓因梵天王處無量劫住是菩薩若有人來作是言我與汝佛所說法一句能淨菩薩所行道令汝得聞若能入大火坑受大苦者當以相與是菩薩作是念我受一句法故尚於三千大千世界火坑從梵天投下何況墮小火坑我等法應盡受一切諸地獄苦猶應求法

何況人中諸小苦惱爲求法故發如是心又如所聞法心常喜樂悉能正觀是菩薩聞諸法已降伏其心於空閑處心作是念如說行者乃得佛法不可但以口之所言菩薩如是能住明地即離諸欲惡不善法有覺有觀離生喜樂入初禪滅覺觀內清淨心一處無覺無觀定生喜樂入二禪離喜故行捨心念安慧身受樂諸賢聖能說能捨常念受樂入三禪斷苦斷樂故先滅憂喜故不苦不樂行捨念淨入四禪是菩薩過一切色想滅一切有對想不念一切別異想故知無邊虛空即入虛空無色定處過一切虛空想知無邊識即入識無色定處過一切識想知無所有即入無所有無色定處過一切無所有處知非有想非無想安隱即入無色非有想非無想處

但隨順諸法行故而不樂著是菩薩以慈心高廣無量無瞋恨無惱害以信解力徧滿一方二方三方四方四維上下亦復如是悲心喜心捨心高廣無量無瞋恨無惱害以信解力徧滿一方第二第三四方四維上下亦復如是是菩薩有種種神通力能動大地一身爲多身多身爲一身現滅還出石壁山障皆能徹過如行虛空於虛空中加跌而去猶如飛鳥入出於地如水無異履水如地身出煙燄如大火聚日月有大神德威力而能以手捫摸摩之身力自在乃至梵世是菩薩以清淨天耳過於人耳悉聞人天音聲遠近是菩薩以他心智如實知他心染心如實知染心離染心如實知離染心瞋心離瞋心癡心離癡心垢心離垢心小心大心散亂心如實知

散亂心定心不定心縛心解心有上心無上  
心如實知有上心無上心如是以自心知他  
心是菩薩念知宿命諸所生處所謂一世二  
世三四五世乃至十二三十三四十五十乃  
至百世千世萬世百千萬億那由他世一劫  
二劫乃至百千萬億那由他無量劫數其中  
諸劫無量成壞於諸劫中所經因緣悉能念  
知我生彼處如是種族如是姓名如是飲食  
如是苦樂如是久住我於彼死生於此間於  
此間死生於彼間如是種種相貌因緣悉能  
念知是菩薩天眼清淨過於人眼見衆生生  
死形色好醜善惡貧賤富貴趣善惡道隨業  
受報皆如實知所謂是諸衆生成就身惡業  
成就口惡業成就意惡業拒逆賢聖受邪見  
教起罪業因緣故身死墮惡道生在地獄是

諸衆生成就善身業善口業善意業不逆賢  
聖信受正見行善業因緣故死後生善處天  
上是菩薩於諸禪定解脫三昧能入能出而  
不隨生但見何處有助菩提法處以願力故  
能生其中是菩薩住明地中見數百千萬億  
那由他諸佛恭敬供養尊重讚歎衣服飲食  
卧具醫藥親近諸佛聽受經法聽受法已隨  
力而行是菩薩爾時觀諸法不生不滅衆緣  
而有於百千萬億劫所集欲縛漸得微薄一  
切有縛一切無明縛皆悉微薄不復積集不  
積集故斷於邪貪邪瞋邪癡諸佛子譬如真  
金巧師鍊治轉更精好光明倍勝菩薩亦如  
是住在明地不集三縛故斷於邪貪邪瞋邪  
癡諸善根轉增明淨是菩薩忍辱心柔軟心  
美妙心不壞心不動心不濁心不高心不下

心一切所作不望報心他少有作當生報心  
 不諂曲心不染亂心轉勝明淨爾時菩薩於  
 四攝法中愛語利益偏多十波羅蜜中忍辱  
 波羅蜜精進波羅蜜轉多餘助菩提法皆轉  
 明淨諸佛子是名諸菩薩第三明地菩薩摩  
 訶薩住是地中多作釋提桓因智慧猛利能  
 以方便因緣轉諸眾生令離婬欲所作善業  
 若布施若愛語若利益若同事皆不離念佛  
 念法乃至不離念具足一切種智常生是心  
 我當何時於眾生中為首為尊乃至於一切  
 眾生中為依止者是人若欲勤加精進於須  
 臾間能得十萬三昧乃至能示十萬菩薩以  
 為眷屬隨其願力神通自在不可算數若干  
 百千萬億那由他劫爾時金剛藏菩薩欲令  
 此義轉明故而說偈言

菩薩以是心 能得第三地 淨心猛獸心  
 離心不退心 堅心堪受心 快心及大心  
 以如是等心 得入於三地 智者住明地  
 觀有為作法 不淨無常苦 無我壞敗相  
 無有牢固性 不久念念滅 如是思惟知

無有來去相 見諸有為法 如病如癰瘡  
 愛心所纏縛 生諸憂悲苦 但為貪恚癡

猛火所焚燒 從無始世來 熾然常不息  
 即時於一切 三界生獸離 惡賤有為法

心無所貪著 但求諸佛智 無量無邊限  
 甚深難思議 清淨無諸苦 如是見佛智

無諸苦惱已 哀愍諸眾生 貧窮無福慧  
 三毒火常然 無有救護者 墮在地獄中

百種苦所切 放逸凡夫人 沒諸煩惱聚  
 盲冥無所見 失諸佛法寶 常隨生死水

無怖空怖畏	我於是衆生	當勤度脫之
精進求智慧	為作饒益者	思惟何方便
可以得救護	惟有諸如來	深妙無礙智
此智何為因	惟從智慧生	思惟是智慧
但從多聞生	如是籌量已	勤求多聞法
日夜常精進	聽受無厭倦	讀誦愛樂法
惟法以為貴	為欲求法故	以諸珍寶等
所親愛妻子	隨意諸眷屬	國土及城邑
資生諸好物	歡喜而施與	心無所戀惜
頭目耳鼻舌	牙齒及手足	支節及血肉
心肝及髓腦	以此等施人	猶不以為難
若得聞正法	是為最甚難	假令有一人
語此菩薩言	汝今若能入	是大猛火聚
然後當與汝	諸佛所說法	聞已即歡喜
自投於火聚	設使大千界	火聚滿其中

須彌梵世下	不足以為難	若為求一句
諸佛所說法	救諸苦惱者	得之甚為難
始從初發心	乃至成佛道	我於其中間
盡此諸劫數	為欲求諸法	備受阿鼻苦
何況於人間	小小諸苦惱	以聽法因緣
能得正憶念	正憶念因緣	能生諸禪定
深妙等三昧	及五神通事	次第皆能起
自在不隨生	菩薩住是地	能以決定心
多供養諸佛	聽受所說法	斷邪愛恚等
餘煩惱微薄	猶如成鍊金	調和得其所
菩薩住是地	福德藏充滿	多作忉利王
自在化姪欲	愛佛功德故	化導無量衆
悉能令得住	無上佛道中	菩薩住是地
能以柔軟心	勤行於精進	得百千三昧
悉得見諸佛	相好莊嚴身	其心轉猛利

願力皆殊勝 常為諸衆生 勤求好事者  
分別解說此 第三明地已

### 十住經卷第二

音釋

獷古猛切 洄戶恢切 澗莫奔切 摸慕各切  
泥奇逆切 劇甚也 匱求位切 捫莫奔切 淤依據切  
也於容切 癰於容切 也於容切 也於容切 也於容切

十住經卷第三

體三

姚秦三藏法師鳩摩羅什共佛陀耶舍譯

炎地第四

諸佛子聞說

如是地相義

深妙無有量

心皆大歡喜

散眾名華香

供養於如來

地及大海水

悉皆大震動

天諸婁女等

於上虛空中

同以微妙音

歌頌此上法

他化自在王

聞已大歡喜

兩摩尼珠寶

以散於佛上

踊躍稱讚言

善哉佛出世

功德藏流布

利益於我等

我今聞說此

菩薩地相義

是事百千劫

難聞而得聞

願更說後地

利益諸天人

僉皆喜欲聞

得地諸行相

解脫月菩薩

重請金剛藏

願為諸菩薩

說至四地行

爾時金剛藏菩薩摩訶薩語解脫月菩薩言

佛子諸菩薩摩訶薩具足清淨行第三地已  
 欲得第四地者當以十法明門得入第四地  
 何等為十一思量眾生性二思量法性三思  
 量世界性四思量虛空性五思量識性六思  
 量欲界性七思量色界性八思量無色界性  
 九思量快信解性十思量大心性諸佛子諸  
 菩薩以此十法明門能從三地入第四地諸  
 佛子菩薩摩訶薩若得第四菩薩炎地即於  
 如來家轉有勢力得內法故有十種智何等  
 為十一不退轉心二於三寶中得不壞信清  
 淨畢竟智三修習觀生滅四修習諸法本來  
 不生五常修習轉還世間行六修習知業因  
 緣故有生七修習分別生死涅槃門差別八  
 修習眾生意業差別九修習前際後際差別十  
 修習現在常滅不住行是十智心則生佛家

轉得勢力復次佛子菩薩摩訶薩住是菩薩  
第四地觀內身循身觀精勤一心除世間貪  
憂觀外身循身觀精勤一心除世間貪憂觀  
內外身循身觀精勤一心除世間貪憂觀內  
受外受內外受內心外心內外心內法外法  
內外法循法觀精勤一心除世間貪憂是菩  
薩未生惡不善法為不生故欲生勤精進發  
心正斷已生諸惡不善法為斷故欲生勤精  
進發心正斷未生諸善法為生故欲生勤精  
進發心正行已生諸善法為住不失修滿增  
廣故欲生勤精進發心正行是菩薩修行四  
如意分欲定斷行成就修如意分依止猒依  
止離依止滅迴向於捨精進定斷行成就修  
如意分心定斷行成就修如意分思惟定斷  
行成就修如意分依止猒離滅迴向於捨是

體三

二

體三

三

菩薩修行信根依止猒離滅迴向於捨精進  
根念根定根修行慧根依止猒離滅迴向於  
捨是菩薩修行信力依止猒離滅迴向於捨  
精進力念力定力修行慧力依止猒離滅迴  
向於捨是菩薩修行念覺分依止猒離滅迴  
向於捨擇法覺分精進覺分喜覺分除覺分  
定覺分修行捨覺分依止猒離滅迴向於捨  
是菩薩修行正見依止猒離滅迴向於捨正  
思惟正語正業正命正精進正念修行正定  
依止猒離滅迴向於捨是菩薩以不捨衆生  
心故行以本願力故大悲為首大慈合行為  
攝一切智為莊嚴佛國為具佛諸力四無畏  
不共法三十二相八十種好具足音聲為隨  
順佛深解脫為思惟大智慧方便故行諸佛  
子諸菩薩摩訶薩住菩薩炎地所有身見為

首等著我著衆生著人壽者知者見者著五  
陰十二入十八界所起屈伸卷舒出没推求  
心所行愛著寶重所見爲歸爲洲皆悉斷滅  
是菩薩轉倍精進慧方便所生助道法隨所  
修行心轉柔和堪任有用心無疲倦轉求上  
法增益智慧救一切世間隨順諸師恭敬受  
教如所說行是菩薩爾時知恩知報恩心轉  
和善同止安樂直心輒心無有邪曲行正定  
行無有憍慢則易與語隨順教誨得說者意  
如是具足善心輒心寂滅心忍辱心淨地諸  
法思惟修行是菩薩爾時成不轉精進者不  
捨精進不壞精進不歇精進不倦精進廣大  
精進無邊精進猛利精進無等等精進救一  
切衆生精進分別是道非道精進是菩薩心  
志清淨不失深心信解明利諸善根增長遠

離世間垢濁不信疑悔等皆已滅盡無疑無  
悔現前具足於一切佛大信解事中不歇不  
捨自然習樂無量之心常現在前菩薩住是  
第四炎地能見諸佛數百數千數千萬億那  
由他佛供養恭敬尊重讚歎衣服飲食卧具  
醫藥親近諸佛一心聽法聽受法已能信奉  
持多於佛所出家修道是菩薩樂心深心清  
淨信解平等轉更明了住壽多劫若干百千  
萬億那由他劫善根轉勝明利諸佛子如上  
真金以爲莊嚴餘金不及如是諸菩薩摩訶  
薩住此菩薩炎地諸善根轉增明利下地菩  
薩所不能及譬如摩尼珠光明清淨能照四  
方餘寶不及雨漬水澆光明不滅菩薩住炎  
地中下地菩薩所不能及一切諸魔及諸煩  
惱皆不能壞其智慧諸佛子是名略說諸菩

薩摩訶薩第四炎地菩薩摩訶薩住是地中  
 多作須夜摩天王多教化衆生破於我心所  
 作善業若布施若愛語若利益若同事皆不  
 離念佛不離念法不離念諸菩薩摩訶薩為  
 伴乃至不離念具足一切種智常生是心我  
 當何時於一切衆生中為首為尊乃至於一  
 切衆生中為依止者是菩薩摩訶薩若欲如  
 是勤行精進須臾之間得百億三昧乃至示  
 現百億菩薩以為眷屬若以願力自在示現  
 過於此數若干百千萬億那由他不可計劫  
 爾時金剛藏菩薩欲重明此義而說偈言  
 諸菩薩具足 修治明地已 觀諸衆生性  
 法性世間性 虛空性識性 三界性信解  
 深心清淨故 得入第四地 即於如來家  
 增長得勢力 不退於佛道 三寶不壞信

觀生滅無作	知世間轉行	從業而有生
生死涅槃異	知衆生諸業	觀法先後際
不住常滅相	佛家生勢力	諸大菩薩等
得如是法已	憐愍諸衆生	習身受心法
內外四念處	依止於馱離	亦依止寂滅
迴向於涅槃	除滅惡法故	善法得增長
習行四正法	修四如意分	習行於五根
及以修五力	修習七覺意	行於八聖道
修習如是法	皆為衆生故	本願之所助
慈悲心為首	求覓一切智	為淨諸佛土
成十力功德	無畏不共法	諸音聲言說
甚深妙道法	及無礙解脫	大智慧方便
從身見為首	六十二見等	衆生見人見
命者知者見	於諸陰界入	之所貪著處
得是第四地	皆悉已除斷	隨斷煩惱業

其心亦隨淨	諸所作善業	皆為救世間
菩薩柔軟心	常不為放逸	堪用心直心
求利眾生心	如此所求事	皆為無上道
大智慧職位	利益世間故	深心敬養師
如說樂修行	知恩報恩者	易化無瞋恨
無有邪曲心	柔和同止樂	修習如是法
精進不退轉	菩薩住是地	深心及直心
淨心與信解	皆轉得明淨	增長諸善根
垢濁疑悔法	如是等諸事	皆悉得除滅
諸菩薩住是	第四炎地中	得值無量佛
諮受所說法	於是諸佛所	出家難沮壞
如真金莊嚴	餘金所不及	菩薩住是地
諸功德深心	智慧及方便	所行清淨道
乃至千億魔	皆所不能壞	如真妙明珠
不為水雨敗	菩薩住是地	天人所供養

多作夜摩王	能轉諸邪見	所作諸善業
皆為佛智慧	其心常堅固	不可得動轉
若勤行精進	得百億三昧	能見百億佛
願力則過是	如是第四地	清淨名為炎
無量福慧者	今已解說竟	
難勝地第五		
諸菩薩聞是	第四地行法	心皆大歡喜
踊躍無有量	雨天眾寶華	雰雰如雨下
咸讚言善哉	金剛藏大士	他化自在王
與諸眷屬等	於上虛空中	心皆大歡喜
放眾妙光明	作天諸妓樂	歌歎佛功德
并及菩薩眾	天諸婁女等	各以清妙音
同聲讚歎佛	而說如是言	世尊久遠來
勤苦所求願	無上正真道	於今始乃得
利益天人者	久乃今得見	釋迦牟尼佛

今至於天宮	從久遠已來	今始異相動
久遠世已來	今始放妙光	衆生從久來
今始得安樂	久遠方得聞	大慈悲德音
度諸功德岸	久遠今乃值	聖王能悉破
憍慢我心等	無比可供養	而今得供養
能開諸天道	使得一切智	世尊甚清淨
無量如虛空	不染於世法	如蓮華在水
處世最高大	猶如大海中	須彌金山王
是故歡喜禮	如是諸天女	各以衆妙音
敬心歌頌已	默然而觀佛	解脫月菩薩
請金剛藏言	菩薩得五地	相貌之因緣
金剛藏菩薩摩訶薩語解脫月菩薩言佛子		
諸菩薩摩訶薩已具足第四地欲得第五地		
以十平等心能入第五地何等爲十一過去		
佛法平等二未來佛法平等三現在佛法平		

等四戒淨平等五心淨平等六除見疑悔淨  
 平等七知道非道淨平等八行知見淨平等  
 九諸菩提分法轉勝淨平等十等化衆生淨  
 平等諸佛子諸菩薩摩訶薩以是十平等淨  
 心具足第四地得入於五地善修菩提法故  
 深心清淨故求轉勝道故則能得佛道是菩  
 薩得大願力以慈悲心不捨於一切以得念  
 慧心道理之勢力修習於福慧不捨起方便  
 欲得轉勝道上地明觀法受諸佛神力所護  
 生定不退心如實知是苦聖諦是苦集諦是  
 苦滅諦是至苦滅道諦是菩薩善知世諦善  
 知第一義諦善知相諦善知差別諦善知示  
 成諦善知事諦善知生起諦善知盡無生諦  
 善知令入道諦次第成菩薩諸地故善知習  
 如來智諦爾時菩薩常在一乘善知第一義

諦隨衆生意令歡喜故知世諦分別諸法自相故知相諦諸法各異故知差別諦分別諸陰界入故知示成諦以身心苦惱故知苦諦諸道生相續故知集諦畢竟滅一切惱熱故知滅諦起不二法故知道諦以一切種智知一切法次第成一切菩薩地故善知習如來智諦以信解力故知非得無盡諦智菩薩如是以此諸諦智如實知一切有爲法虛偽誑詐敗壞相假住須臾誑惑凡人菩薩爾時於衆生中大悲轉勝而現在前能生大慈光明得如是智慧力不捨一切衆生常求佛智慧如實觀一切有爲法先際後際知衆生從先際無明有愛故生流轉生死於五陰歸處不能動發增大苦惱聚是中無我無我所無衆生無人無知者無壽命者後際亦如是如是

無所有而愚癡貪著不斷不知無邊有出無出爾時作是念凡夫衆生甚爲可恠無明癡故有無量無邊阿僧祇身已滅今滅當滅如是常受生死不能於身生厭離想轉更增長機關苦身常爲生死水漂不能得返歸五陰舍不能捨離不畏四大毒蛇不能拔出憍慢見箭不能滅除貪恚癡炎不能破壞無明愚闇不能乾竭愛著大海不求十力大聖導師常隨魔意於生死城中多爲諸惡覺觀所轉如是苦惱孤窮衆生無有救者無有舍者無有究竟道者唯我一人獨無等侶修集福德智慧以是資糧令此一切衆生得住畢竟清淨乃至使得一切法中佛無礙智力如是思惟從正觀生於智力發願所作一切善根皆爲度諸衆生故爲一切衆生求好事故求安

樂故爲利益一切衆生故爲解脫一切衆生  
故爲一切衆生無苦惱故爲一切衆生無羸  
惡故爲一切衆生心清淨故爲調伏一切衆  
生故爲滅一切衆生諸憂惱苦滿其願故是  
菩薩爾時住此第五難勝地中不忘諸法故  
名爲念者決定智慧故名爲智者知經書意  
次第故名爲有道者自護護彼故名爲有慚  
愧者不捨持戒故名爲堅心者善思惟是處  
非處故名爲覺者不隨他故名爲隨智者善  
分別諸法章句義故名爲隨慧者善修禪定  
故名爲得神通者隨世間法行故名爲方便  
者善集福德資糧故名爲無厭足者常求智  
慧因緣故名爲不捨者集大慈大悲因緣故  
名爲無疲倦者常正憶念故名爲遠離破戒  
者深心求佛十力四無所畏十八不共法故

名爲常念佛法者常令衆生離惡修善故名  
爲莊嚴佛國者種諸福德莊嚴三十二相八  
十種好故名爲行種種善業者求莊嚴佛身  
口意故名爲常行精進者供養一切說法菩  
薩故名爲樂大恭敬者一切菩薩諸世間方  
便中心無瞋礙故名爲心無礙者常樂教化  
衆生故名爲晝夜遠離餘心者菩薩如是行  
時布施亦教化衆生愛語利益同事亦教化  
衆生又以色身示現亦教化衆生亦以說法  
教化衆生亦示菩薩行事教化衆生亦示諸  
佛大事教化衆生亦示生死過惡教化衆生  
亦示諸佛智慧利益教化衆生菩薩如是修  
習以大神力種種因緣方便道教化衆生是  
菩薩雖種種因緣方便心常在佛智而不退  
失善根又復常求轉勝利益衆生法是人利

益衆生故世間所有經書技藝文章算數石  
性經書治病醫方所謂治乾痲病小兒病鬼  
著病蠱毒病癩病等妓樂歌舞戲笑歡娛經  
書國土城郭法聚落室宅園觀池泉華果藥  
草林樹金銀摩尼珠瑠璃珊瑚琥珀磔磔碼  
碯示諸寶聚日月五星二十八宿占相吉凶  
地動夢書性相身中諸相布施持戒攝伏其  
心禪定神通四禪四無量心四無色定凡諸  
不惱衆生事安樂衆生事憐愍衆生故出此  
法令入諸佛無上之法菩薩住是難勝地值  
數百數千數萬億佛供養尊重讚歎衣服飲  
食卧具醫藥親近聽法聽法已出家出家已  
於諸佛所聽受經法而爲法師說法利益得  
轉勝多聞諸三昧乃至過百千萬億劫不忘  
此事是菩薩爾時一切福德善根轉勝明淨

佛子譬如成鍊真金以磔磔磨瑩其光轉勝  
菩薩住是地中方便智慧力故功德善根轉  
淨明勝下地所不及又如日月星宿諸天宮  
殿風持令去不失法度如是佛子菩薩住難  
勝地以方便思惟故福德善根轉倍明淨而  
不取證亦不疾至佛道諸佛子是名諸菩薩  
摩訶薩難勝地已略說菩薩摩訶薩住是地  
中多作刪兜率陀天王諸根猛利能摧伏一  
切外道有所作業若布施愛語利益同事皆  
不離念佛念法念諸菩薩爲伴乃至不離念  
具足一切種智我當何時於衆生中爲首爲  
尊乃至於一切衆生中爲依止者諸佛子是  
菩薩若欲如是勤行精進須臾之間能得千  
億三昧乃至示千億菩薩以爲眷屬若以願  
力神力自在復過是數若干百千萬億不可

得知爾時金剛藏菩薩欲明此義故而重說偈言

諸菩薩具足 四地行法已 思惟三世佛 戒等心亦等 除見疑悔等 道非道行等 觀諸平等已 得入第五地 四念處為弓

諸根為利箭 四正勤為馬 四如意為車

五力以為鎧 破諸煩惱賊 勇健不退轉

直入第五地 慚愧無垢衣 淨戒以為香

七覺為華鬘 禪定為塗香 智慧與方便

種種念莊嚴 如是得入諸 陀羅尼園林

四如意為足 正念為頭頂 慈悲明淨眼

利智慧為牙 以空無我乳 破諸煩惱賊

如是人師子 能入第五地 是菩薩得至

住於第五地 轉修勝淨法 皆為佛道故

常行慈悲心 未曾有厭倦 但為修習此

第五地行法 深集二資糧 福德及智慧

種種方便力 欲得上明觀 常為佛所護

得成於念慧 次第能善觀 如實知諸諦

第一諦世諦 差別諦成諦 事生滅道諦

至無障礙諦 如是觀諸諦 心微妙清淨

雖為未能得 無障礙解脫 以能有智慧

及與信力故 得勝於一切 世間諸智慧

如是觀諸諦 悉知有為法 虛妄為詐詐

無有一堅實 能得於諸佛 慈悲光明分

為諸眾生故 專心求佛慧 知有為先後

眾生甚可愍 墮在無明闇 愛因緣所繫

是菩薩能拔 世間之苦惱 知法無壽者

猶如草木等 眾生常以二 煩惱因緣故

從於先世來 後世亦如是 相續不斷絕

不能盡苦邊 於此生愍傷 我當度脫之

不出五陰舍 不畏四大害 不拔諸邪箭

不滅三毒火 不破無明闇 墮在大愛海

無有智慧眼 離大導師故 知如是事已

轉加勤精進 有所作起業 皆為度眾生

常令正念慧 修道有慚愧 堅心與智慧

轉更令增益 十三 修福慧無厭 持戒不羸弱

求多聞無倦 正修淨佛土 種相好音聲

因緣無狀足 所作諸善業 皆為利眾生

為利世間故 造立經書等 石性鬼病方

歌舞戲笑等 堂閣園林法 衣服諸飲食

示種種寶聚 令眾得歡喜 占日月五星

二十八宿等 地動吉凶相 夢書諸怪事

布施持戒等 離欲修禪定 四無量神通

安樂世間故 大智慧菩薩 得此難勝地

供養數億佛 從佛而聽法 所修諸善根

皆悉得明淨 猶如碑礫寶 瑩磨於真金

譬如寶宮殿 隨風不失法 世法利不染

如蓮華在水 菩薩住是地 多作兜率王

諸根轉猛利 破諸外道見 所作諸善業

皆為佛智慧 得佛力無畏 能度諸眾生

是菩薩勤修 轉勝精進力 能得千萬億

諸深妙三昧 供養千億佛 能動千世界

隨其所願力 過是數無量 如是第五地

種種諸方便 上智慧大人 如法解說竟

現前地第六

諸菩薩聞說 上地之行相 在於虛空中

雨眾妙珍寶 放清淨光明 供養於世尊

咸讚言善哉 善哉金剛藏 時有無量億

諸天皆歡喜 於上虛空中 雨眾寶末香

光明相綺錯 微妙甚可樂 眾香華瓔珞

播蓋兩佛上	他化自在王	與諸眷屬等
兩眾妙寶物	雰雰如雪下	歌頌供養佛
稱歎金剛藏	咸讚言善哉	善哉快說此
千萬億天女	於上虛空中	作眾天音樂
歌歎佛功德	咸作如是言	如來之所說
微妙無有量	能滅諸煩惱	諸法本性空
無有毫末相	空無有分別	同若如虛空
無有去住相	亦無有戲論	本來常清淨
如如無分別	若人能通達	一切諸法性
於有於無中	其心不動搖	但以大悲心
為度諸眾生	是名諸佛子	從佛口法生
常行於布施	利益諸眾生	本來雖善淨
持戒而堅心	雖知法無傷	而行於忍辱
雖知法性離	而行於精進	雖先滅煩惱
而入於諸禪	雖先解法空	而選擇諸法

寂滅智雖多 而求利世間 能滅諸惡者  
名之為大人 如是諸天女 百千種妙音  
稱讚歌頌已 皆默然觀佛 解脫月菩薩  
請金剛藏言 當以何相貌 得成第六地  
金剛藏菩薩言諸佛子菩薩摩訶薩已能具  
足五行欲入六地當以十平等法得入於  
六地何等為十一以無相故一切法平等二  
以無想故一切法平等三以無生故一切法  
平等四以無滅故一切法平等五以本來清  
淨故一切法平等六以無戲論故一切法平  
等七以不取不捨故一切法平等八以離故  
一切法平等九以幻夢影響水中月鏡像炎  
化故一切法平等十以有無不二故一切法  
平等諸佛子諸菩薩摩訶薩具足五行行以  
是十平等法能入第六地諸佛子若菩薩摩

訶薩能如是觀一切法性能忍隨順得入六地無生法忍雖未現前心已明利成就順忍是菩薩觀一切法如是相大悲為首增長具足更以勝觀世間生滅相故作是念世間所有受身生處皆以貪著我故若離著我則無世間生處諸凡夫人愚癡所盲貪著於我常樂求有恒隨邪念行邪妄道習起三行罪行福行不動行以是行故起熱心種子有漏有取心故起生死身所謂業為地識為種子無明覆蔽愛水為潤我心澆灌種種諸見令得增長生名色芽因名色故生諸根諸根合故有觸生從觸生受樂受故生渴愛渴愛增長故有四取四取因緣故起業於有起五陰身名為生五陰衰變名為老衰變滅名為死老死因緣有憂悲熱惱眾苦聚集是十二因緣

無有集者自然而集無有散者自然而散因緣合則有因緣散則無菩薩摩訶薩如是於六地中隨順觀十二因緣又作是念不如實知諸諦第一義故有無明覆心無明業果是名諸行依諸行有初識與識共生有四取陰依止取陰有名色名色成就有六入諸根行塵故有識從是和合生有漏觸觸共生有受貪樂於受名為愛愛增長名為取從取起有漏業有業有果報五陰名為生五陰熟名為老五陰壞名為死死別離時愚人貪著心熱名為憂悲發聲啼哭五識名為苦意識名憂憂苦轉多名為惱如是但生大苦樹大苦聚如是十二因緣苦聚無我無我所無作者無使作者菩薩作是念若有作者則有作事若無作者則無作事第一義中無作者無作事

體三

十六

又作是念三界虛妄但是心作如來說所有十二因緣分是皆依心所以者何隨事生貪欲心是心即是識事是行行誑心故名無明識所依處名名色以入生貪心名六入三事和合有觸觸共生名受貪著所受名為渴愛渴愛不捨名為取是和合故名為有此有更

有有相續名為生生變熟名為老老壞名死此中無明有二種作一者緣中癡二者為生諸行因行亦有二種作一者生未來世果報二者與識作因識亦有二種作一者能令有相續二者與名色作因名色亦有二種作一者互相助成二者與六入作因六入亦有二種作一者能緣六塵二者能與觸作因觸亦有二種作一者能觸所緣二者能與受作因受亦有二種作一者覺憎愛事二者與愛作

因愛亦有二種作一者所可染中生貪心二者與取作因取亦有二種作一者能增長煩惱二者與有作因有亦有二種作一者能於餘道中生二者與生作因生亦有二種作一者能起五陰二者與老作因老亦有二種作一者令諸根熟二者與死作因死亦有二種作一者壞五陰身二者以不見智故而令相續不絕是中無明緣諸行者無明令行不斷助成行故行緣識者令識不斷助成識故識緣名色令名色不斷助成名色故乃至生緣老死憂悲苦惱生不斷相續以助成故無明滅故則諸行滅乃至老死憂悲苦惱亦如是是中無明若無諸行亦無因滅餘分亦如是是中無明愛取是三分不斷煩惱道諸行及有不斷業道餘因緣分不斷苦道先際後際

相續不斷故是三道不斷是三道離我我所而有生滅如二竹相對而住不堅似堅無明因緣諸行者即是過去世事識名色六入觸受是現在事受取有生老死是未來世事於是三世名出無明滅故諸行滅名為斷相續說十二因緣說名三苦無明行識名色六入名為行苦觸受名為苦苦愛取有生老死憂悲苦惱名為壞苦無明滅故諸行滅乃至老死滅名為斷三苦相續說因無明諸行生餘亦如是無明滅諸行滅以諸行體性空故餘亦如是無明因緣諸行以生縛說餘亦如是無明滅故諸行滅以滅縛說餘亦如是無明因緣諸行是隨順無所有觀說無明滅諸行滅是隨順盡觀說餘亦如是如是逆順十種觀十二因緣法所謂因緣分次第身心所

攝自助成法不相捨離隨三道行分別先後際故二苦差別故從因緣起生滅縛故無所有盡觀故爾時菩薩隨十二因緣無我無眾生無壽命者無人性空離作者使作者無主屬眾因緣無所有如是觀時空解脫門現在前滅此事餘不相續故名無相解脫門現在前知此二種更不樂生惟除大悲心教化眾生無願解脫門現在前菩薩修行是三解脫門離彼我相離作者受者相離有無相悲心轉增以重悲心故勤行精進未滿助菩提法欲令滿足菩薩作是念有為和合故增離散則滅眾緣具故增不具故滅我今知有為法多過故不應具和合因緣亦不畢竟滅有為法為教化眾生故諸佛子菩薩如是知有為法多過無性離堅固相無生無滅與大慈悲

和合不捨衆生即時得無障礙般若波羅蜜  
光明現在前得如是智慧具足修集取阿耨  
多羅三藐三菩提因緣而不與有爲法共住  
觀有爲法性寂滅相亦不住其中欲具足無  
上菩提分故菩薩住現前地中得決定空三  
昧性空三昧第一義空三昧第一空三昧大  
空三昧合空三昧生空三昧如實不分別空  
三昧攝空三昧離不離空三昧如是等萬空  
三昧門現在前無相無願三昧亦如是是菩  
薩住現前地中志心決定心妙心深心不轉  
心不捨心廣心無邊心樂智心慧方便和合  
心如是等心轉勝增長故隨順阿耨多羅三  
藐三菩提一切外道論師不能傾動入於智  
地轉聲聞辟支佛決定向佛智一切衆魔及  
諸煩惱所不能制安住菩薩智慧明中善修

應空無相無願解脫門專以慧方便行助菩  
提法是菩薩住現前地於般若波羅蜜中得  
轉勝行得第三上順忍以順是法無有違逆  
故菩薩住是現前地中得見數百數千佛乃  
至數百千萬億佛供養恭敬尊重讚歎衣服  
飲食卧具醫藥親近諸佛於諸佛所聽法聽  
法已如實隨智慧光明故如所說行令諸佛  
歡喜是人轉勝知諸佛法藏乃至無量百千  
萬億劫諸善根轉妙明淨諸佛子譬如真金  
以瑠璃磨瑩光色轉勝菩薩住此現前地以  
慧方便故善根轉勝明淨寂滅餘地所不及  
諸佛子譬如月明能令衆生身得清涼四種  
風吹不能過絕菩薩摩訶薩住是現前地善  
根轉勝能滅無量衆生煩惱之火四種惡魔  
所不能壞諸佛子是名諸菩薩摩訶薩現前

地菩薩住是地中多作善化自在天王智慧  
 猛利能破一切增上慢者聲聞問難不能窮  
 盡有所施作布施愛語利益同事皆不離念  
 佛念法念諸菩薩伴乃至不離念一切種智  
 常發願言我於一切衆生為首為尊乃至於  
 一切衆生為依止者是菩薩勤精進於須臾  
 間得十萬億三昧乃至能示十萬億菩薩眷  
 屬若以願力能過是數不可稱計若干百千  
 萬億劫爾時金剛藏菩薩欲令此義明了故  
 而說偈言

諸菩薩已得 具足行五地 知諸法無性  
 無相無生滅 本來常清淨 無有諸戲論  
 修習如是智 得入第六地 諸法常離相  
 不取亦不捨 性空猶如幻 離二無分別  
 若能順如是 微妙之理趣 心無有違逆

得入第六地 住於利順忍 智慧得力故  
 觀察於一切 世間生滅相 悉知諸世間  
 皆從癡闇出 癡闇若滅者 則無諸世間  
 觀擇因緣法 隨順第一義 而不壞緣報  
 所作及假名 如實無作者 亦無有受者  
 如是觀有為 如雲無實事 不知真諦義  
 名之為無明 從是則生思 身口行得報  
 從行故有識 即生於名色 如是生世間  
 至生死苦聚 了知於三界 但從心而有  
 知十二因緣 在於一心中 如是則生死  
 但從心而出 體三 心若得滅者 生死則亦滅  
 無明二種作 作癡作於業 乃至於老死  
 破散壞五陰 從於此事邊 具出於苦惱  
 是事若盡者 苦惱則亦盡 無明若具足  
 相續則不斷 因緣若不具 則斷於相續

無明及愛取	即是煩惱道	行有是業道
餘則是苦道	癡至於六入	是名為行苦
觸受是苦苦	餘分是壞苦	滅三苦相續
則更無有我	無明及諸行	則是過去世
識乃至於愛	是則為現在	從愛而生苦
則是未來世	無明若滅者	是則無有苦
癡從眾緣生	則生於諸縛	眾緣若滅者
則滅於諸縛	從因而生果	因滅則果滅
如是觀諸法	自性則皆空	隨順於無明
則有世間出	若逆於無明	是則斷於有
從是則有是	是無則無是	如是十種觀
甚深因緣法	觀因緣相續	去來及現在
不離一心中	分別有三道	從三種苦觀
及以生滅法	無所有而盡	能行逆順觀
菩薩如是入	十二因緣法	知空猶如幻

如夢亦如影	如炎亦如化	虛誑無作者
亦無有受者	但誑於愚人	如是觀因緣
智者所修空	無緣則無相	知此二虛假
其諸一切有	於中無所願	但以大悲心
愍度眾生故	如是諸大士	修習解脫門
悲心愛樂佛	無量諸功德	知諸有為法
皆從和合有	即得萬空定	無相願亦爾
智慧轉增進	入於上順忍	得於諸菩薩
無為智解脫	如是諸善根	轉勝明淨利
供養無量佛	諸佛所稱讚	常於諸佛所
出家學佛道	到諸佛法藏	善根轉增長
猶如瑠璃寶	瑩磨於真金	光明轉清淨
其喻亦如是	如於虛空中	滿月光清淨
四種風所吹	不能令遏絕	菩薩智慧光
滅諸煩惱熱	四魔不能制	其喻亦如是

菩薩住是地 多作善化王 諸根悉猛利

能破增上慢 所作諸善業 皆隨順智慧

聲聞諸問難 不能得窮盡 是佛子若欲

如是勤精進 能得於百千 億數諸三昧

得見於百千 億數十方佛 如春清了時

日光明淨好 如是第六地 深妙難知見

聲聞所不了 大士略說竟

### 十住經卷第三

#### 音釋

漬疾智切 澆古堯切 零撫文切 虵食遮切 瘡

相邀切 羸力追切 遏烏割切

渴病也 羸弱也 遏止也

十住經卷第四

體四

姚秦三藏法師鳩摩羅什共佛陀耶舍譯

遠行地第七

爾時諸天衆

在於虛空中

雨香華珍寶

如雲散佛上

踊躍發妙音

咸讚言善哉

善哉金剛藏

善知第一義

無量功德聚

人中之蓮華

說此上妙行

利益諸世間

他化自在王

雨光明華香

霧霧而供養

除憂煩惱者

諸天及天王

發妙音聲言

若聞此地義

則為得大利

時作百千種

上妙諸妓樂

諸天女喜歌

承佛神力故

佛是最寂滅

能令惡為善

一切諸世間

皆所共恭敬

雖出過世間

知是世間法

知身同實相

而示種種身

雖以諸言音

演說寂滅法

而知於語言

無有音聲相

能過百千土 上妙供諸佛 知身佛國土

捨相智自在 雖教化衆生 而無彼我想

廣集大功德 不於中起著 以見取相故

三毒火然世 不取一切相 慈悲起精進

諸天及天女 歡喜設供養 如是讚歎已

默然而觀佛 爾時解脫月 請金剛藏言

大衆皆清淨 願說七地相

金剛藏菩薩言諸佛子菩薩摩訶薩已具足

第六地行若欲入第七菩薩地者從方便慧

起十妙行何等為十是菩薩善修空無相無

願而以慈悲心處在衆生隨諸佛平等法而

不捨供養諸佛常樂思惟空智門而廣修集

福德資糧遠離三界而能莊嚴三界畢竟寂

滅諸煩惱炎而能為衆生起滅貪恚癡煩惱

炎法隨順諸法如幻如夢如影如響如化如

水中月鏡中像不二相而起分別種種煩惱  
及不失業果報知一切佛國土空如虛空諸  
國土皆是離相而起淨佛國土行知一切佛  
法身無身而起色身三十二相八十種好以  
自莊嚴知諸佛音聲不可說相信解如來音  
聲本來寂滅相而隨一切衆生起種種莊嚴  
音聲知諸佛於一念頃通達三世事而知種  
種相種種時種種劫得阿耨多羅三藐三菩  
提隨衆生心信解故作如是說諸佛子是名  
從慧方便生十妙行菩薩摩訶薩具足六地  
行已修此十妙行得入第七地諸佛子如是  
方便慧現前故名爲入七地是菩薩住七地  
中入無量衆生性入無量諸佛教化衆生法  
入無量世間性入諸佛無量清淨國土入無  
量諸佛差別法入無量諸佛智得無上道入

無量諸劫算數入無量諸佛通達三世入無  
量衆生信樂差別入無量諸佛色身別異入  
無量諸佛衆生志行諸根差別入無量諸佛  
音聲語言令衆生歡喜入諸佛無量衆生心  
心所行差別入無量諸佛隨智慧行入示無  
量聲聞乘信解入諸佛無量說道因緣令衆  
生信解入無量辟支佛智慧習成入諸佛無  
量甚深智慧所說入諸菩薩無量所行道入  
諸佛無量所說大乘集成事令衆生得入諸  
菩薩作是念如是諸佛世尊有無量無邊大  
勢力不可以若干百千萬億劫算數所知如  
是諸佛勢力我皆應集不以強分別此彼得  
成以不分別不取相故成此菩薩如是智慧  
善思惟常修習大方便慧令其安住入佛道  
智中以不動法故若欲常起種種度衆生道

無有障礙來時亦起去時亦起坐卧住立皆能起道度脫衆生離諸陰蓋住諸威儀常不離如是想念是菩薩於念念中具足菩薩十波羅蜜及菩薩十地何以故是菩薩摩訶薩於念念中以大悲心爲首修習一切佛法皆回向如來智慧故十波羅蜜者以菩薩求佛道所修善根與一切衆生故是檀波羅蜜能滅一切煩惱熱是尸羅波羅蜜慈悲爲首於一切衆生中無所傷是羸提波羅蜜求轉勝善根無厭足是毗梨耶波羅蜜修道心不馳散常向一切智是禪波羅蜜忍諸法先來不生門是般若波羅蜜能起無量智門是方便波羅蜜期轉勝智慧是願波羅蜜一切外道諸魔不能沮壞是力波羅蜜於一切法相如實成故是智波羅蜜如是念念中具足十波

羅蜜是菩薩具足十波羅蜜時念念中亦具足四攝法三十七助菩提分法三解脫門舉要言之一切助阿耨多羅三藐三菩提法於念念中皆悉具足爾時解脫月菩薩問金剛藏菩薩言佛子菩薩摩訶薩但於七地中具足助菩提法一切諸地中亦具足金剛藏菩薩言佛子菩薩摩訶薩但於十地中悉具足助菩提法但第七地勝故得名何以故諸菩薩摩訶薩於七地中功德具足入智慧神通道故佛子菩薩於初地中發願緣一切佛法故具足助菩提法第二地中除心惡垢故具足助菩提法第三地中願轉增長得法明故具足助菩提法第四地中得入道故具足助菩提法第五地中隨順行世間法故具足助菩提法第六地中入甚深法門故具足助菩

提法此第七地中起一切佛法故具足助菩提法何以故諸佛子菩薩摩訶薩於此地中得諸智慧所行道以是力故第八地自然得成佛子譬如二三千大千世界一定清淨一定垢穢是二中間難可得過但以大精進力大神通力大願力故乃能過耳諸佛子諸菩薩如是行於雜道難可得過但以大願力大智慧力大方便力故乃可得過解脫月菩薩言第七菩薩地爲是淨行爲是垢行金剛藏菩薩言從初歡喜地來菩薩所行皆離煩惱罪業何以故回向阿耨多羅三藐三菩提故隨地所行清淨不名爲過佛子譬如轉輪聖王乘大寶象遊四天下知有貧窮苦惱者而過不在王然王未免人身若捨王身生於梵世住梵天宮遊行大千世界示梵王威力爾

時乃至離人身諸佛子菩薩亦如是從初地來在諸波羅蜜乘知一切衆生心所行事及煩惱垢而不爲煩惱垢之所汙以乘善道故而不名爲過若菩薩捨於一切所修功行道從第七地入於八地爾時名爲乘菩薩清淨乘悉知一切世間諸煩惱垢而不爲諸煩惱所汙亦名爲過諸佛子菩薩住是七地多過貪欲等諸煩惱衆生在此七地不名有煩惱者不名無煩惱者何以故一切煩惱不發起故不名有煩惱者貪求如來智慧未滿願故不名無煩惱者菩薩住是七地成就深淨身業深淨口業深淨意業是菩薩所有不善業道諸佛所訶隨煩惱垢者如是諸業悉已得過所有善業道諸佛所讚是則常行又世間經書技藝如五地中說自然而得於三千大

千世界中最爲希有得爲大師惟除如來入  
八地菩薩無有衆生深心妙行能與等者是  
菩薩所有禪定神通解脫三昧雖未得果報  
所生處而隨意自在菩薩住是遠行地於念  
念中具足修習方便慧力及一切助菩提法  
轉勝具足住是遠行地中能入善擇菩薩三  
昧善思議三昧益意三昧分別義藏三昧如  
實擇法三昧堅根安住三昧智神通門三昧  
法性本三昧如來利三昧種種義藏三昧不  
向生死涅槃三昧如是具足百萬菩薩三昧  
能淨治此地是菩薩得是三昧智慧方便善  
清淨故深得大悲力故名爲過聲聞辟支佛  
地趣佛智地是菩薩住是七地無量身業無  
相行無量口業無相行無量意業無相行是  
菩薩清淨行故顯照無生法忍解脫月菩薩

言佛子菩薩若住初地有無量身業無量口  
業無量意業已能過一切聲聞辟支佛地金  
剛藏菩薩言緣大法故能過非是實行力此  
第七地自實行力故一切聲聞辟支佛所不  
能壞佛子譬如生在王家即勝一切羣臣百  
官何以故豪尊力故身既長大智慧成立真  
實得勝諸佛子菩薩摩訶薩初發心時已勝  
一切聲聞辟支佛以發大願深心清淨故今  
住此地自以智力故勝諸佛子菩薩住在七  
地得甚深遠離無行身口意業轉求勝法而  
不捨離以是轉勝心故雖行實際而不證實  
際解脫月言佛子菩薩摩訶薩從何地來能  
入寂滅金剛藏言菩薩摩訶薩從第六地來  
能入寂滅今住此地於念念中能入寂滅而  
不證寂滅是名菩薩成就不可思議身口意

業行實際而不證實際佛子譬如有人乘船入於大海善為行法善知水相不為水患所害如是菩薩摩訶薩住此七地乘諸波羅蜜船能行實際而不證實際菩薩如是以大願力故得智慧力故從禪定智慧生大方便力故雖深愛涅槃四而現身生死雖眷屬圍遶而心常遠離以願力受生三界而不為世法所汙心常善寂以方便力故而還熾然雖熾不燒隨行佛智轉聲聞辟支佛地得至諸佛法藏而現於魔界雖過四魔道而現行魔行雖現諸外道行而深心不捨佛法雖現身一切世間而心常在出世間法所有莊嚴之事勝諸天龍夜叉乾闥婆阿脩羅迦樓羅緊那羅摩睺羅伽人非人等四天王釋提桓因梵天王而不捨樂法愛法菩薩成就如是智慧住

是遠行地中值百千萬億那由他諸佛供養恭敬尊重讚歎衣服飲食卧具醫藥供養諸佛已護持諸佛法諸聲聞辟支佛智慧問難所不能壞是菩薩憐愍眾生故法忍轉得清淨是菩薩無量百千萬億那由他劫善根轉勝清淨佛子譬如成鍊真金以諸好寶莊嚴間錯轉勝明好餘寶不及諸佛子菩薩亦如是住菩薩遠行地中諸善根從方便智慧生轉勝明淨無能壞者佛子譬如日光一切星宿月光所不能及閻浮提內所有泥水悉能乾竭菩薩亦如是住遠行地善根轉勝一切聲聞辟支佛所不能及又能乾竭眾生煩惱汙泥諸佛子是名菩薩摩訶薩第七遠行地菩薩摩訶薩住是地中多作他化自在天王諸根猛利能發眾生悟道因緣所作善業若

布施若愛語若利益若同事皆不離念佛不離念法不離念諸菩薩摩訶薩伴乃至不離念具足一切種智常生是心我何時當於一切衆生中爲首爲尊乃至於一切衆生中爲依止者是菩薩若欲如是勤行精進於須臾間得百千億那由他三昧乃至能示現百千萬億那由他菩薩眷屬若菩薩以願力自在示現過於此數百千萬億那由他劫數不可計知爾時金剛藏菩薩欲重明此義而說偈言

深智慧定心 具行六地已 一時生方便  
 智慧入七地 行空無相願 而修慈悲心  
 順佛平等法 而供養諸佛 雖以智觀空  
 而修福無厭 然後能得入 第七遠行地  
 雖能嚴三界 而心樂遠離 雖心常寂滅

而滅煩惱者 行空不二法 如幻如夢等  
 而行慈悲心 得入第七地 雖觀一切土  
 空若如虛空 而能善莊嚴 清淨諸佛土  
 雖知諸佛身 同法相無相 而種三十二  
 八十諸相好 雖知於諸法 不可言說相

而嚴佛音聲 令世歡喜故 雖知於諸佛  
 一念中成道 而示時劫處 引導諸衆生  
 如是知於法 則得法照明 菩薩如是者  
 即入第七地 住是地能觀 無量衆生行  
 亦知於諸佛 勢力亦無量 世間及劫數  
 法性皆無量 又知諸衆生 所欲之所樂  
 知說三乘法 皆悉是無量 我當應教化  
 成就是衆生 以如是思惟 方便慧和合  
 於四威儀中 常行如是道 於一一念中  
 能具助菩提 所謂是十種 波羅蜜等法

如是諸菩薩	所修之福德	皆與諸衆生
名檀波羅蜜	滅除心惡垢	名尸波羅蜜
不為六塵傷	羸提波羅蜜	能起轉勝法
精進波羅蜜	於是道不動	名禪波羅蜜
無生忍是名	般若波羅蜜	回向佛道名
方便波羅蜜	求於轉勝法	名願波羅蜜
無有能壞者	名力波羅蜜	能解如實說
名智波羅蜜	是助菩提法	念念皆能攝
發於廣大願	緣於大事故	初地中功德
名之為具足	第二地名為	除諸心垢惡
第三願增明	第四地住道	第五隨世行
第六入深法	得無生相分	漸漸而增長
第七集一切	具菩提分法	能起諸功德
及以一切願	如是諸功德	令後八地中
一切諸所行	自然得清淨	遠行地難過

大智力所行	如二國中	難可得過度
在於七地中	不汙如聖王	住於此道中
不名一切過	若到於第八	菩薩智慧地
爾時過意界	住於智業中	如梵王觀世
不得名為人	菩薩罪不汙	如蓮華在水
菩薩住是地	過種種煩惱	不名有煩惱
不名盡煩惱	入是正道中	無有諸煩惱
願求佛道故	不名盡煩惱	於諸世間中
經書技藝事	文頌呪術等	自然能了知
修習諸禪定	及諸神通等	無量心利世
是事皆能起	爾時此菩薩	過於二乘行
安住第七地	菩薩諸行中	以初發心時
大願力故勝	今於此地中	智慧力故勝
猶如國王子	小時豪姓勝	後以功行成
於諸人中勝	住此得深智	轉發勝精進

念念入寂滅	而亦不取證	猶如人乘船
入於大海中	雖行深水難	不為水所害
菩薩行轉勝	方便智慧故	功德悉備足
諸世所難知	供養無量佛	其心清淨故
如真金雜寶	間錯而莊嚴	得佛智慧光
乾諸愛水潤	猶如日光明	消涸於泥濘
菩薩住是地	他化自在王	諸根悉猛利
通達諸道果	若欲勤精進	見十萬千億
那由他諸佛	願力過是數	十地智慧淨
一切世二乘	皆所共難知	今已略說竟
不動地第八		
他化自在王	諸天及菩薩	聞說此上行
心皆大歡喜	供養佛弟子	雨上妙華香
瓔珞衆播蓋	末香諸寶衣	真妙摩尼珠
莊嚴身諸物	如雲空中下	散佛及大衆

天女於空中	作種種妓樂	供養於如來
并及諸菩薩	同以微妙音	歌頌諸功德
一切智慧者	衆生中最尊	憐愍世間故
佛現神通力	華香珍寶等	皆出如是音
所有毛塵沙	各示那由他	無量數諸佛
於中而說法	於一毛頭中	見無量佛國
須彌鐵圍海	世間不迫隘	於一毛頭中
見有三惡道	天人阿脩羅	各各受業報
見諸佛國中	一切佛妙音	轉無上法輪
隨起衆生念	諸佛世界中	衆生身種種
國有衆生身	衆生身有國	一切諸天人
皆悉雜共住	佛先觀察已	然後為說法
微塵中國土	衆生心想細	以國土麤故
衆生心想麤	佛現如是等	種種神通力
若為衆生說	是事不可盡	如是以妙音

稱歎於世尊 心皆大歡喜 默然而觀佛  
解脫月菩薩 請金剛藏言 佛子今可說  
入於八地相

金剛藏菩薩言佛子諸菩薩摩訶薩已習七  
地微妙行慧方便道淨善集助道法大願力  
故心住不滅諸佛神力所護善根得力常念  
隨順如來力無畏不共法樂心深心善淨成  
就福德智力大慈悲心故不捨一切衆生修  
行無量智道能入諸法本來無生無滅無相  
不出不失不去不還無所有性初中後平等  
不異如來無分別智一切心意識憶想分別  
無所貪著入一切法如虛空性是名菩薩得  
無生法忍入第八地即時得是第八不動地  
名爲深行菩薩難得知無能分別離一切  
相離一切想離一切貪著無量無邊不可思

議一切聲聞辟支佛所不能壞深大遠離而  
現在前諸佛子譬如比丘得於神通心得自  
在次第乃入滅盡定一切動心意想分別心  
所行事皆悉盡滅菩薩亦如是住是遠行地  
即時一切忽務都滅得無身口意務住大遠  
離諸佛子如人夢中欲渡深水是人爾時發  
大精進施大方便欲渡此水未渡之間廓然  
便覺所渡方便乃忽遽事即皆放捨諸佛子  
菩薩摩訶薩亦如是從初已來發大精進廣  
修行道至不動地一切遽事悉皆放捨不行  
二心諸所憶想不復現前譬如生梵世者欲  
界煩惱不現在前如是諸佛子菩薩住是不  
動地一切心意識不現在前乃至佛心菩提  
心涅槃心尚不現前何況當生世間心諸佛  
子是菩薩摩訶薩隨順是地以本願力故又

諸佛為現其身住在諸地法流水中如來智慧力為作因緣諸佛皆作是言善哉善哉善男子汝得是第一忍順一切諸佛法善男子我有佛十力四無所畏十八不共法汝今未得當為得是諸功德故加勤精進亦莫捨此忍門善男子汝雖得此第一甚深寂滅解脫十三凡夫衆生不善非寂滅常發種種煩惱為種種覺觀所害汝當愍此衆生又善男子汝應念本所願欲大利益衆生欲得不可思議智慧門又善男子一切法性一切法相若有佛若無佛常住不異諸如來不以得此法故說名為佛聲聞辟支佛亦能得此寂滅無分別法善男子汝觀我等無量清淨身相無量智慧無量清淨國土起無量智慧無量方便無量圓光無量淨音汝今應起如是等事又善

男子汝今適得此一法明所謂一切法寂滅無有分別無生法明我等所得無量無邊若干億劫算數所不能知汝為得此故應起此法又善男子汝觀十方無量國土無量衆生無量諸法差別汝應如實通達是事隨順如是智是菩薩諸佛與如是等無量無邊起智慧因緣門以此無量門故是菩薩能起無量智差別業皆悉成就諸佛子我今為汝說若諸佛不令此菩薩住如是智慧門者是菩薩爾時畢竟則取涅槃捨利益一切衆生以諸佛與此菩薩如是無量無邊起智慧因緣故於一念中所生智慧比從初地已來乃至竟第七地百分不及一千萬億分百千萬億那由他乃至無量無邊阿僧祇分不及一乃至算數譬喻所不能及所以者何先以一身行

道修集功德今此地中得無量身修菩薩道以無量音聲以無量智慧無量生處無量清淨國土無量教化衆生供養給侍無量諸佛故隨順無量佛法故無量神通力故無量大會差別故無量身口意業集一切菩薩所行道以不動法故佛子譬如乘船欲入大海未得大海多用功力或以手力若至大海不復用力但以風力而去若本功力於大海中一日之行於百千歲不能得及諸佛子諸菩薩摩訶薩亦如是多集善根資糧乘大乘船到菩薩所行大智慧海於須臾間不施功力能近一切諸佛智慧本所施功若一劫若百千萬劫不能得及諸佛子菩薩摩訶薩得至第八地從大方便慧生無功用心在菩薩道思惟諸佛智慧勢力所謂知世界生世界滅世

界壞世界成知以何業因緣滅故世界壞知以何業因緣集故世界成是菩薩知地性小相知地性大相知地性無量相知地性差別相知水火風性小相大相無量相差別相知微塵細相知微塵差別相於一世界中所有微塵差別皆悉能知此一世界所有地若干微塵皆悉能知若干大水火風微塵皆悉能知若干寶物斤兩微塵若干衆生身微塵世界中萬物微塵差別分別衆生羸身細身從若干微塵生地獄身從若干微塵生畜生身以若干微塵生餓鬼身以若干微塵生阿脩羅身以若干微塵生天身以若干微塵生人身皆悉了知是菩薩入如是分別微塵智中知欲界壞知欲界成知色界壞知色界成知無色界壞知無色界成知欲界色界無色界

成壞知欲界小相知欲界大相知欲界無量  
相知欲界差別相知色界無色界小相大相  
無量相差別相如是知三界是名菩薩教化  
衆生助智明分善知分別衆生身善觀所應  
生處隨衆生生處隨衆生身而爲受身是菩  
薩現身徧滿三千大千世界隨衆生身各各  
差別如日於一切水皆現其像若二三千大  
千世界三四五十二三三十四十五十百三  
千大千世界若干若萬若百萬若干萬若億  
若百千萬億那由他世界身徧其中乃至無  
量無邊不可思議不可說三千大千世界身  
徧滿其中隨衆生身差別而爲受身是菩薩  
成就如是智慧於一世界身不動搖乃至不  
可說諸佛世界隨衆生身隨所信樂於諸佛  
大會而現身像若於沙門會中示沙門形色

婆羅門衆中示婆羅門形色刹利衆中示刹  
利形色居士衆中示居士形色四天王衆中  
帝釋衆中魔衆中梵天衆中示梵天形色乃  
至阿迦膩吒天衆中示阿迦膩吒天形色以  
聲聞乘度者示聲聞形色以辟支佛乘度者  
示辟支佛形色以菩薩乘度者示菩薩形色  
以佛身度者示佛身形色諸佛子所有不可  
說諸佛國土中隨衆生身信樂差別現爲受  
身而實遠離身相差別常住諸身平等是菩  
薩知衆生身知國土身知業報身知聲聞身  
知辟支佛身知菩薩身知如來身知智身知  
法身知虛空身是菩薩如是知衆生深心所  
樂若於衆生身作已身若於衆生身作國土  
身業報身聲聞身辟支佛身菩薩身如來身  
智身法身虛空身若於國土身作已身業報

身乃至虛空身若於業報身作已身乃至虛  
空身若於已身作衆生身國土身業報身聲  
聞身辟支佛身菩薩身如來身智身法身虛  
空身是菩薩知衆生集業身報身煩惱身色  
身無色身諸佛國土小相大相垢相淨相無  
量相廣相倒相平相曲相方相差別相知業  
報身假名差別聲聞身假名差別辟支佛身  
假名差別菩薩身假名差別如來身差別菩  
提身願身化身受神力身相好莊嚴身勢力  
身意生身福德身智身法身善分別如實成  
諸身相知諸法身平等不壞相知虛空身無  
量相周徧相無形相是菩薩善知起如是諸  
身則得命自在心自在財物自在業自在生  
自在願自在信解自在如意自在智自在法  
自在是菩薩得是菩薩十自在即時爲不可

思議智者無量智者廣智者不可壞智者菩  
薩隨如是智慧畢竟常淨起無罪身業口業  
意業身業隨智行口業隨智行意業隨智行  
般若波羅蜜爲增上大悲爲首善修方便善  
起諸願善爲諸佛神通所護常不捨行利益  
衆生智悉知無邊世界中差別事諸佛子舉  
要言之菩薩住無動地身口意業所作皆能  
集一切佛法是菩薩到此地中離一切煩惱  
故善住淨心力中心常不離道故善住深心  
力中不捨衆生故善住大悲力中救一切世  
間故善住大慈力中不忘所聞法故善住陀  
羅尼力中分別選擇一切佛法故善住一切  
樂說力中行無邊差別世界故善住神通力  
中不捨一切菩薩所行故善住願力中修集  
一切佛法故安住波羅蜜力中善起一切種

智故安住如來力中是菩薩得如是智力示一切所作無有過咎諸佛子諸菩薩摩訶薩此地不可壞故名爲不動地智慧不轉故名爲不轉地一切世間難測知故名威德地無家過故名王子地隨意自在故名菩薩生地更不作故名爲成地善擇智故名爲究竟地善發大願故名爲變化地不壞諸法故名爲勝處地善修起先道故名爲無功力地諸佛子諸菩薩摩訶薩得如是智慧名爲得入佛境界名爲佛功德所照明名爲隨佛威儀行趣向佛法常爲諸佛神力善護常爲四天王釋提桓因梵天王等所奉迎常爲密迹金剛神之所侍衛善能生諸甚深禪定常能作無量諸身差別於諸身中皆有勢力得大果報神通力於無邊三昧中得自在能受無量記

隨衆生成就處示成阿耨多羅三藐三菩提是菩薩入如是大智慧善通達諸法常放大慧光明度無障礙法性道善知世間性道差別能示一切諸功德隨意自在善解先際後際能入迴轉魔道智中入如來所行境界中能於無邊世界行菩薩道以不轉相故是故此地名爲不動諸佛子諸菩薩摩訶薩在不動地善生禪定力故常不離見無量無邊諸佛而不捨羸現供具供給諸佛是菩薩於一劫中一一世界中見數百千萬億那由他無量無邊阿僧祇佛供養恭敬尊重讚歎具一切供養事而用供養親近諸佛從諸佛受世間別異等諸法明是人轉深入如來法藏問世間性差別事中無能盡者乃至百千萬億劫說不可盡又諸善根轉勝明淨譬如成

鍊真金巧匠雜寶作瓔珞已繫四天下主頸  
 所佩閻浮提人無能奪者諸佛子菩薩摩訶  
 薩亦如是住是無動地諸善根轉勝明淨一  
 切聲聞辟支佛乃至七地菩薩所不能壞善  
 薩住是地以善分別智門故智慧光明滅衆  
 生惱熱佛子譬如千世界主大梵天王能於  
 一時流布慈心滿千世界亦能放光徧照其  
 中諸佛子菩薩摩訶薩亦如是住無動地中  
 能放身光照十方三千大千世界微塵數等  
 世界衆生次能滅諸惱熱令得清涼諸佛子  
 是名略說菩薩摩訶薩不動地若廣說者無  
 量劫數所不能盡菩薩住是地中多作大梵  
 天王主千世界諸根猛利與諸衆生聲聞辟  
 支佛菩薩波羅蜜道因緣無有窮盡說世間  
 性差別中無能壞者所作善業若布施若愛

語若利益若同事皆不離念佛念法念諸善  
 薩伴乃至不離念一切種智常生是心我當  
 何時於衆生中為首為尊乃至於一切衆生  
 中為依止者是菩薩若欲勤行精進於須臾  
 間得百萬三千大千世界微塵數諸三昧乃  
 至能示百萬三千大千世界微塵數菩薩眷  
 屬若以願力神通自在能過是數若干百千  
 萬億劫不可稱計爾時金剛藏菩薩欲重明  
 此義而說偈言

菩薩住七地 慧方便已淨 善集助道法  
 大願之所繫 諸佛神力護 善根悉成就  
 求於勝智故 能入第八地 善集於福慧  
 而有深慈悲 離諸有量心 心同如虛空  
 如所說法中 心得決定力 如是得寂滅  
 微妙無生忍 諸法從本來 無生亦無滅

無相亦無出	不夫亦不行	諸法初中後
與如無分別	無有心意行	同若如虛空
成就如是忍	無有諸戲論	得是不動地
甚深寂滅行	一切諸世間	不能得測量
一切諸心相	皆悉已壞盡	菩薩住是地
心識無分別	如入滅盡定	無念想分別
猶如人夢中	遽欲行渡水	覺則意廓然
自知無所作	得是深忍已	一切想念滅
亦如諸梵天	無欲界煩惱	先以願力護
諸佛今勸言	如是第一忍	是諸佛職位
我等深智力	無畏不共法	汝既無有此
當加勤精進	汝今雖得滅	一切煩惱火
當觀諸世間	煩惱常熾然	當念本所願
欲利諸衆生	悉徧知諸法	廣度於一切
諸法實性相	常住無變異	二乘亦得此

不以得名佛	但以得無礙	甚深微妙智
通達三世故	乃得名爲佛	是諸無等等
天人所恭敬	開是衆智門	令入諸佛法
成就無邊底	無量妙智慧	先所行諸法
不及今一念	如是諸菩薩	得妙智慧地
能在一念中	身徧於十方	入是智慧門
行道疾無障	如行於大海	風力令去疾
離諸功用心	但在於智業	觀十方世界
成壞及與住	能知四大一	亦知種種異
小大無量相	種種諸差別	能數知三千
大千界微塵	亦知衆生身	四大微塵數
諸天身衆寶	微塵數差別	皆悉徧照了
餘亦如是知	智慧因緣故	心轉得調柔
爲利諸衆生	徧諸世界身	能於衆生身
而自作已身	及諸佛世界	諸餘種種身

如日月隨風	影現一切水	菩薩亦如是
隨順智慧風	常住於法性	湛然不移動
於淨心衆生	各現其身像	隨諸心所樂
而現為受生	於諸人天會	悉皆示其身
菩薩於因緣	和合中自在	乃至能隨意
而為現佛身	衆生國土身	業報賢聖身
智身與法身	智皆同平等	以是因緣故
得如意神通	為令世歡喜	而現種種身
能得於十種	妙大自在智	所作隨智行
順於慈悲心	諸佛所有法	皆能善修習
住三淨業中	不動如須彌	能得大菩薩
所有十種力	一切諸魔衆	皆所不能轉
常為諸佛護	釋梵所敬禮	密迹金剛神
常隨而侍衛	菩薩得是地	功德無有量
百千萬億劫	說之不可盡	得近無數佛

增益諸善根 如真金雜寶 莊嚴在王頸  
 菩薩在是地 多作大梵王 典領千國土  
 功德富無量 能以三乘教 而無有窮盡  
 慈心光普照 破諸煩惱熱 若欲於須臾  
 能得百三千 大千世界數 微塵諸三昧  
 能見十方佛 其數亦如是 若以其願力  
 過是無有量 今已略解說 第八地妙相  
 若廣演說者 千億劫不盡

十住經卷第四

音釋

羸提 羸語也此云忍 技 業綺切 涸 下各切  
羸提 羸語也此云忍 厚羸初限切 技 業綺切 涸 下各切  
 遽 其據切 急也

十住經卷第五

體五

姚秦三藏法師鳩摩羅什共佛陀耶舍譯

妙善地第九

佛子演說此 八地妙義時 以佛神力故

震動無量國 一切智身出 無量微妙光

徧照十方界 衆生得安樂 千萬數菩薩

住於虛空中 設衆妙供養 諸天所無有

大自在天王 并及他化王 歡喜衆妙供

大海功德佛 天女數千萬 恭敬咸歡喜

同以微妙音 歌歎佛功德 以佛神力故

出如是妙法 善行寂滅者 無有諸惡心

各在於其地 善修菩薩行 利益世間故

徧遊於十方 示衆以佛道 心同空無礙

諸菩薩神力 上妙供養具 勝十方人天

福德之所致 佛子樂智者 以此示佛力

於一國不動 而現一切處 利益於世間

如滿月明淨 滅一切音聲 語言諸想念

而以諸音聲 說法猶如響 隨衆生下劣

其心默沒者 示說聲聞道 令出於衆苦

隨所有衆生 諸根少利者 樂於因緣法

為說辟支佛 隨所有利根 利益衆生者

有大慈悲心 為說菩薩道 若無上大心

決定樂大事 為示於佛身 說無量佛法

譬如幻化師 示種種身色 如是諸身相

皆無有實事 如是諸佛子 善知智慧術

能示一切行 心離於有無 諸天女千萬

微妙音歌歎 如是歌歎已 默然而觀佛

又解脫月言 佛子大會淨 一心願樂聞

過八地正行

爾時金剛藏菩薩言佛子諸菩薩摩訶薩以

如是無量智慧善觀佛道欲更求轉勝深寂  
滅解脫欲轉勝思惟如來智慧欲入如來深  
密法中欲選擇取不可思議大智慧欲選擇  
諸陀羅尼三昧重令清淨欲令諸神通廣大  
欲隨順世間差別行修諸力無畏佛不共法  
無能壞者順行諸佛轉法輪力欲不捨所受  
大悲大願得入第九地諸菩薩住此地中如  
實知起善不善無記法行知有漏無漏法行  
世間出世間法行思議不可思議法行定不  
定法行聲聞法行辟支佛法行菩薩道法行  
如來地法行有爲無爲法行隨順如是智慧  
如實知菩提心所行難知諸煩惱難業難諸  
根難欲樂難性難志心難深心難生難殘氣  
難三聚差別難知衆生諸心差別相心雜相  
心輕轉相心壞不壞相心無形相心無邊徧

自在相心清淨差別相心垢相心無垢相心  
縛相心解相心諂曲相心質直相心隨道相  
皆如實知是菩薩知煩惱深相知淺相知煩  
惱心伴相不離相知使纏差別相知是心相  
應不相應相知是生時得果報相知是三界  
中差別相知愛癡見深入如箭相知憍慢癡  
重罪相知是三業因緣不斷相略說乃至如  
實知入八萬四千煩惱行差別相是菩薩知  
諸業善不善無記相分別未分別相心伴相  
不離相自然盡相行道盡相種相集相不失  
果報相次第相有報相無報相黑黑報相白  
白報相黑白黑白報相非黑非白能盡業相  
知業起處相受業法別異相知無量因緣起  
業相知世間業出世間業差別相現報相生  
報相後報相隨諸乘定相不定相略說乃至

如實知八萬四千諸業差別相是菩薩知諸  
根輒中利差別相知先際後際別異不別異  
相知上中下相知煩惱伴相不相離相隨諸  
乘定相不定相淳熟相未淳熟相隨心行相  
易壞相深取相增上相不可壞相轉相不轉  
相三世差別相深隱共生差別相略說乃至  
如實知八萬四千諸根差別相是菩薩知衆  
生諸欲樂輒中利相略說乃至如實知八萬  
四千欲樂差別相是菩薩知諸性輒中利相  
略說乃至如實知八萬四千諸性差別相是  
菩薩知深心輒中利相略說乃至如實知八  
萬四千深心差別相是菩薩分別知諸結使  
有伴共心生不共心生心相應心不相應深  
心相無始來隨惱衆生相與一切禪定解脫  
神通相違堅繫縛三界繫無量心而不現前

開諸業門而無所知可治相無所有相無定  
事相不異聖道相滅動相是菩薩如實知諸  
衆生差別相所謂地獄畜生餓鬼阿脩羅人  
天差別色界無色界差別有想無想差別業  
是田愛是水無明是黑闇覆識是種子後身  
是生芽名色共生而不相離有癡愛相續相  
欲生欲作欲受不離樂衆生相分別三界差  
別相三有相續相皆如實知是菩薩如實知  
諸習氣若有餘若無餘隨所生處有習氣隨  
共衆生住有習氣隨業煩惱有習氣隨善不  
善無記有習氣離欲有習氣隨後身有習氣  
次第隨逐有習氣深入道斷相持煩惱相離  
則無法皆如實知是菩薩如實知衆生定不  
定相正定相邪定相不定相邪見中邪定相  
正見中正定相離此二是無定相一一五逆

是邪定相五根是正定相邪位是邪定正位  
是正定更不作故離此二位是不定相深入  
邪聚有難轉相令修無上道因緣相不定聚  
邪定聚衆生守護相皆如實知佛子諸菩薩  
摩訶薩隨如是智名為安住妙善地菩薩住  
是地已知衆生如是諸行差別相隨其解脫  
而與因緣是菩薩知化衆生法知度衆生法  
如實知而為說法聲聞乘相辟支佛乘相菩  
薩乘相如來地相如實知隨衆生因緣而為  
說法隨心隨根隨欲樂差別而為說法又隨  
行處隨智慧處而為說法知一切行處隨而  
說法隨衆生性深入難處而為說法隨道隨  
生隨煩惱隨習氣轉故說法隨樂令解脫故  
說法是菩薩住此地中為大法師守護諸佛  
法藏墮在大法師深妙義中用無量慧方便

四無礙智起菩薩言辭說法是菩薩常隨四  
無礙智而不分別何等為四一法無礙二義  
無礙三辭無礙四樂說無礙是菩薩用法無  
礙智知諸法自相以義無礙智知諸法差別  
以辭無礙智知無分別說諸法以樂說無礙  
智知諸法次第不斷復次以法無礙智知諸  
法無體性以義無礙智知諸法生滅相以辭  
無礙智知諸法假名而不斷假名說以樂說  
無礙智隨假名不壞無邊說復次以法無礙  
智知現在諸法差別相以義無礙智知過去  
未來諸法差別相以辭無礙智知過去未來  
現在諸法以無分別說以樂說無礙智知於  
一一世得無邊法明故說復次以法無礙智  
知諸法差別以義無礙智知諸法義差別以  
辭無礙智知隨諸言音而為說法以樂說無

礙智知隨所樂解而爲說法復次以法無礙智以法智知諸法差別以方便知諸法無差別以義無礙智以比智如實知諸法差別以辭無礙智以世智知說諸法差別以樂說無礙智以如實智知善說第一義復次以法無礙智知諸法一相不壞以義無礙智知善入陰入界諦因緣法以辭無礙智知一切世間之所歸趣以微妙音故以樂說無礙智知所說轉勝能令衆生得無邊法明復次以法無礙智知諸法無有分別攝在一乘以義無礙智知入分別諸法差別門以辭無礙智能說諸乘無分別義以樂說無礙智以一法門說無邊法明復次以法無礙智能入一切菩薩行智行法行隨智行以義無礙智能分別說十地義差別以辭無礙智不分別說隨順諸

地道以樂說無礙智能說一切行無邊相復次以法無礙智知一切佛於一念中得菩提以義無礙智知種種時處差別以辭無礙智知隨諸佛得道事差別說以樂說無礙智知於一句法無邊劫中說而不窮盡復次以法無礙智知一切佛語一切佛力無所畏不共法大慈大悲無礙智轉法輪等隨順一切智以義無礙智知隨如來音聲出入萬四千隨衆生心隨根隨欲樂差別以辭無礙智知以如來音聲不分別說一切諸行以樂說無礙智知以諸佛智慧力隨衆生所樂音聲說諸佛子菩薩摩訶薩如是善知無礙智安住第九地名爲得諸佛法藏能爲大法師得衆義陀羅尼衆法陀羅尼起智陀羅尼衆明陀羅尼善意陀羅尼衆財陀羅尼名聞陀羅尼威

德陀羅尼無礙陀羅尼無邊旋陀羅尼雜義  
藏陀羅尼得如是等百萬阿僧祇陀羅尼隨  
應方便說如是無量樂說差別門演法是菩  
薩得如是無量陀羅尼門能於無量諸佛所  
聽法聞已不忘如所聞法能以無量差別門  
爲人演說是菩薩隨五於一佛所以百萬阿僧祇  
陀羅尼聽受法如從一佛聽法餘無量無邊  
諸佛亦如是是菩薩於禮敬佛時所聞法明  
門非多學聲聞得陀羅尼力於十萬劫所能  
受持是菩薩得如是陀羅尼力諸無礙智樂  
說力以說法故在於法座徧三千大千世界  
衆生隨意說法是菩薩在法座上惟除諸佛  
及受職菩薩於一切中最爲殊勝心中得無  
量法明是菩薩處於法座或以一音令一切  
大衆悉得解了即得解了或以種種音聲令

一切大衆各得開解即得開解或以默然但  
放光明令一切大衆各得解法即得解法或  
以一切毛孔皆出法音或三千大千世界所  
有色無色物皆出法音或以一音周滿世界  
性悉令得解是菩薩三千大千世界所有衆  
生一時問難一一衆生以無量無邊音聲差  
別問難如一人所問餘者異問是菩薩於一  
念中悉受如是問難但以一音皆令開解如  
是二三千大千世界三四五十二三十四  
十五十若百三千大千世界若干三千大千  
世界若萬十萬百萬若億三千大千世界若  
十億百千萬億那由他乃至不可說不可說  
三千大千世界滿中衆生廣爲說法時承佛  
神力能爲衆生廣作佛事倍復精勤攝取如  
是智明若於一毫末中有不可說不可說世

界微塵數大會佛在此中而為說法佛隨若干衆生心說法令一一衆生心中得若干無量諸法如一佛一切佛在大會中說法皆亦如是如一毛頭一切十方世界皆亦是於是中應生大憶念力於一念中從一切佛所受一切法明而不失一句如上大會滿中衆生聽法我於是中以決定清淨法明演說令得開解於一念中今爾所衆生皆得歡喜何況若干世界中衆生是菩薩住是地中善根轉勝晝夜更無餘念深入諸佛行處常與一切佛會深入菩薩解脫菩薩隨順如是智常見諸佛而於一一劫中無量無邊百千萬億以上妙供具供養諸佛於諸佛所種種問難通達諸陀羅尼是菩薩善根轉勝明淨如是佛子如成鍊金具足莊嚴轉輪聖王寶冠若

在瓔珞一切小王四天下人無能奪者諸佛子菩薩摩訶薩亦如是住此妙善地中諸善根轉勝明淨無能壞者聲聞辟支佛及諸地菩薩所不能壞是菩薩善根轉明能照衆生煩惱難處照已還攝佛子譬如大梵王三千

大千世界一切所有難處皆悉能照菩薩亦如是住是菩薩妙善地中善根明淨照衆生煩惱難處照已還攝諸佛子是名略說菩薩摩訶薩第九菩薩妙善地若廣說則無量無邊劫不可得盡菩薩摩訶薩住是地中多作

大梵王典領三千大千世界無有能勝如實解義者於自在中而得自在善能宣說聲聞辟支佛菩薩波羅蜜衆生問難無能窮盡所作善業若布施若愛語若利益若同事皆不離念佛念法念菩薩伴乃至不離念一切種

智常生是心我當何時於衆生中爲首爲尊  
 乃至於一切衆生中爲依止者是菩薩若欲  
 如是勤行精進於一念中得百萬阿僧祇三  
 千大千世界微塵數三昧乃至能示百萬阿  
 僧祇三千大千世界微塵數菩薩眷屬若以  
 願力神通自在復過是數百千萬億那由他  
 劫不可稱說爾時金剛藏菩薩欲重明此義  
 而說偈言

諸菩薩隨順	無量深智力	第一最微妙
一切世難知	利益衆生者	能至第九地
得入於諸佛	祕密之藏處	得微妙最上
三昧陀羅尼	廣大神通力	善入世間相
智慧力決定	能觀諸佛法	大願悲心淨
得入第九地	順行此上地	持諸佛藏者
即能通諸法	善不善無記	是有漏無漏

世間出世間	是即可思議	是不可思議
知法定非定	三乘具足相	思惟分別此
有爲無爲相	起知如是法	破諸無明闇
隨順是智心	則爲第一妙	悉知諸衆生
險難諸雜心	輕躁易轉心	無邊自在心
煩惱深淺相	心伴不離心	又知使纏相
隨順相續有	知業種種雜	各各差別相
因滅果不失	通達如是事	又知於衆生
諸根輒中利	廣大差別等	先際後際相
上中下差別	及諸欲樂等	乃至能悉知
八萬四千種	<small>莊五</small> 世間性亦爾	<small>十</small> 煩惱見難處
無始來不斷	諸心一切使	皆與心共行
縛心難可斷	知諸結使等	但妄想分別
無有方處所	亦無定事相	亦不離於身
又亦難得知	禪定力能遮	金剛道能斷

又能知衆生	入六道差別	愛水癡闇覆
業田識是種	生於後身芽	名色共增長
無始生死來	相續在三界	及知天龍等
煩惱諸業心	若離於心者	是則無所有
一切諸衆生	皆在三聚中	或沒諸邪見
或在於智道	菩薩住是地	悉知衆生心
諸根及欲樂	種種差別等	深心善思惟
隨宜而說法	通達無礙智	善以言辭說
菩薩爲法師	猶如師子王	牛王如山王
安住無所畏	普於諸世界	雨美甘露味
猶如大龍王	能雨滿大海	是菩薩善知
法義辭無礙	善能隨順行	具足樂說力
能得於百萬	阿僧祇總持	能受諸佛法
如海受龍雨	菩薩得如是	諸深妙清淨
無量陀羅尼	諸三昧力故	能於一念中

得見無量佛	聞已淨梵音	演說妙法寶
是菩薩或教	大千界衆生	隨心根所好
說法令歡喜	如是等無量	三千大千國
轉深勤精進	而作是思惟	或於一毛頭
無量佛說法	佛爲種種人	演說於妙法
是菩薩皆受	如地受諸種	復作如是願
十方諸所有	國土中衆生	皆合爲一會
應於一念中	皆悉知其心	以一音說法
悉令斷疑網	菩薩住是地	人天中法王
爲大說法師	隨順衆生心	常於日夜中
與諸佛共會	能住甚深妙	寂滅智解脫
供養無量佛	善根轉明淨	猶如轉輪王
真金嚴寶冠	光明照衆生	煩惱險難處
如梵王光明	照於大千界	菩薩住是地
作三千大千	世界大梵王	諸根悉猛利

善以三乘法	示悟諸衆生	所作諸善業
皆順於正念	能在一念中	而得於無量
世界微塵數	諸深妙三昧	得見十方佛
微妙音說法	見佛大神力	更發無量願
如是第九地	大智所行處	深妙難知見

今已略說竟

法雲地第十上

說諸大菩薩	所行無上事	無數那由他
首陀會諸天	於上虛空中	心皆大歡喜
咸以恭敬心	衆妙供養佛	那由他菩薩
歡悅無有量	燒諸奇妙香	滅除諸煩惱
他化自在王	與諸天人衆	住在虛空中
心皆大歡喜	咸以恭敬心	種種設供養
各散衆寶衣	空中旋轉下	無量億天女
諸根欣悅豫	於上虛空中	敬心供養佛

同作無量億	那由他妓樂	於諸衆物中
皆出如是音	佛坐於此處	悉徧於一切
十方國土中	皆亦有佛現	無量億種種
相好莊嚴身	殊妙無有比	充滿於世界
於一毛孔中	出無量光明	滅除於一切
世間煩惱火	十方微塵數	不可得計量
一毛孔光明	亦復不可盡	各見有佛身
以三十二相	八十好莊嚴	轉於無上輪
或見佛種種	為衆而說法	或見在兜率
教化於諸天	或見從兜率	來下處胞胎
或見初生時	或見夜出家	或見坐道場
而成無上道	或見轉法輪	或見入涅槃
於無量國土	種種而示現	欲度衆生故
皆有如是事	譬如巧幻師	善知於幻術
多示諸衆生	種種諸異身	如是佛慧中

善巧於示現 變化一切身 周徧諸世間  
 如諸法空寂 先來無性相 同若如虛空  
 大師亦如是 得入第一義 微妙之性相  
 隨於法性相 示佛大神力 諸佛所行性  
 一切諸衆生 皆在是性中 相可相同相  
 一切諸法等 入在於第一 體五 寂滅義趣中  
 悉皆無有相 若欲得佛智 應離諸想念  
 有無俱通達 疾作天人師 諸天姝女衆  
 皆出如是等 千萬種妙音 寂然而觀佛  
 解脫月菩薩 見衆皆寂然 請金剛藏言  
 大名稱佛子 菩薩從九地 至於第十地  
 諸大神通力 願今為略說  
 爾時金剛藏菩薩言佛子諸菩薩摩訶薩如  
 是無量智慧善修行佛道乃至九地善集諸  
 白法集無量助道法大功德智慧所護廣行

大悲深知分別世間性差別深入衆生難處  
 至諸如來行處念隨順如來寂滅行處趣向  
 諸佛力無所畏不共法等堅持不捨得至一  
 切智慧位諸佛子菩薩摩訶薩隨行如是智  
 近佛位地則得菩薩離垢三昧而現在前又  
 入法性差別三昧莊嚴道場三昧雨一切世  
 間華光三昧海藏三昧海印三昧虛空廣三  
 昧觀擇一切法性三昧隨一切衆生心行三  
 昧如實擇一切法三昧得如來智信三昧如  
 是等百萬阿僧祇三昧皆現在前是菩薩悉  
 入此三昧善知其中功用差別最後三昧名  
 益一切智位是三昧現在前時大寶蓮華王  
 出周圍如百萬三千大千世界一切衆寶間  
 錯莊嚴過一切世間所有出世間善根所生  
 行諸法如幻性空慧所成光明能照一切世

界大寶瑠璃為莖勝一切諸天所有不可量  
栴檀王為臺大碼瑙寶為鬚閻浮檀金光為  
葉中有無量光明一切妙寶皆在其內寶網  
覆上滿十三大千世界微塵數蓮華為眷  
屬爾時菩薩其身姝妙稱可華座是菩薩得  
益一切智位釋五三昧力故身現在大蓮華座上  
即時諸眷屬蓮華上皆有菩薩圍遶之一一  
菩薩坐蓮華上即得百萬三昧皆一心恭敬  
瞻仰大菩薩是菩薩昇蓮華座時十方現在  
一切世界皆大震動一切惡道皆悉休息光  
明普照十方世界一切世界皆悉嚴淨皆得  
見聞一切諸佛大會何以故是菩薩坐大蓮  
華座上即時足下出百萬阿僧祇光明照十  
方阿鼻地獄等滅衆生苦惱兩膝上放若干  
光明悉照十方一切畜生滅除苦惱齋放若

若干光明照十方一切餓鬼滅除苦惱左右脅  
放若干光明照十方人身安隱快樂兩手放  
若干光明照十方諸天阿脩羅宮殿兩肩放  
若干光明照十方聲聞人項放若干光明照  
十方辟支佛口放若干光明照十方世界諸  
菩薩身乃至住九地者白毫放若干光明照  
十方得位菩薩身一切魔宮隱蔽不現頂上  
放百萬阿僧祇三千大千世界微塵數光明  
照十方諸佛大會圍遶世界十布住於虛空  
成光明網高釋五大明淨供養諸佛如是供養從  
初發心乃至九地菩薩所作供養十五百分不及  
一乃至百千萬億分不及一乃至算數譬喻  
所不能及是大光明網勝十方世界所有華  
香末香燒香塗香衣服播蓋衆寶瓔珞摩尼  
寶珠供養之具以從出世善根生故一一佛

大會上皆雨衆寶狀如大雲若有衆生覺知如是供養者當知皆是必定無上大道如是諸光雨大供養已還遠諸佛大會十市入諸佛足下爾時諸佛及大菩薩知其世界中某甲菩薩摩訶薩行如是道成就受職諸佛子即時十方無邊菩薩乃至住九地者皆來圍遶設大供養一心恭敬瞻視各得萬三昧諸得職菩薩摩訶薩於金剛莊嚴曾出一大光名破魔賊有無量百千萬光以爲眷屬照十方世界示無量神力亦來入是大菩薩曾此光明滅已是菩薩即時得大勢力神通智慧百千萬倍諸佛子爾時諸佛出眉間白毫相光名益一切智有無量無邊光明眷屬照一切十方世界無有遺餘十市圍遶一切世界示於諸佛大神通力勸進無量無邊百千萬

億諸菩薩一切十方世界六種震動滅除一切惡道苦惱一切魔宮皆蔽不現示一切諸佛得道之處示一切諸佛大會莊嚴事廣大如法性究竟如虛空照明一切世界已集在虛空右遶示大神通莊嚴之事入是菩薩頂上其諸眷屬光明入諸眷屬蓮華菩薩頂上即時諸菩薩各得先所未得十千三昧是光明入此菩薩頂如一佛光一切佛光皆亦如是一切十方佛光明入是菩薩頂時名爲得職名爲入諸佛界爲具佛十力當墮在佛數

諸佛子譬如轉輪聖王長子大夫人所生成就轉輪王相轉輪聖王令子在白象寶閻浮檀金座上取四大海水上張羅幔種種莊嚴幢幡妓樂執金鍾香水灌子頂上即名爲灌頂大王具足轉十善道故得名轉輪聖王諸

佛子菩薩摩訶薩亦如是受職時諸佛以智水灌是菩薩頂名灌頂法王具足佛十力故墮在佛數諸佛子是名諸菩薩摩訶薩大智慧職地以是職故諸菩薩摩訶薩受無量百千億萬苦行難事是菩薩得是職已住菩薩法雲地無量功德智慧轉增諸佛子菩薩住是法雲地如實知集欲界集色界集無色界如實知集世間性集衆生性集識性集有爲性集無爲性集虛空性集法性集涅槃性集邪見諸煩惱性如實知諸世間行法還法知集聲聞道集辟支佛道集菩薩道集諸佛力無畏不共法集色身法身集一切智慧如是集得佛道集轉法輪集示滅度舉要言之如實知示集一切法差別是菩薩以如是智慧隨順菩提行如實轉深入知衆生化業化煩

惱化諸見化世性化法性化聲聞化辟支佛化菩薩化如來化一切化分別化無分別化皆如實入是菩薩爾時如實知佛十力所持如實知法處持如實知業持煩惱持時持願持先世持行持劫壽持智持是菩薩住十地中諸佛所有微細行智所謂細微生死智細微世智細微出家智細微得道智細微神力自在智細微轉法輪智細微持壽命智細微示涅槃智細微法久住智如是等細微智皆如實知又諸佛密處所謂身密口密意密籌量時非時密與菩薩授記密攝伏衆生密諸乘差別密八萬四千諸根差別密業如實所作密行密得菩提密如是等密皆如實知是菩薩諸佛所有入劫智所謂一劫攝阿僧祇劫阿僧祇劫攝一劫有數攝無數無數攝有

數一念攝無量世無量世攝一念劫攝非劫  
非劫攝劫有佛劫攝無佛劫無佛劫攝有佛  
劫過去未來劫攝現在劫現在劫攝過去未  
來劫未來過去劫攝現在劫現在劫攝未來  
過去劫長劫攝短劫短劫攝長劫諸劫攝相  
皆如實知是菩薩諸佛所入毛道智若入微  
塵智若國土智身心智得道智若衆生身心  
得道智若衆生行智得道智徧行佛道智順  
行示智逆行示智不可思議智世間能知聲  
聞能知辟支佛能知菩薩能知有不能知但  
如來能知皆如實入諸佛子諸佛智廣大無  
量無邊菩薩住是地則能得入如是智慧諸  
佛子是菩薩摩訶薩隨是地行得菩薩不可  
思議解脫得菩薩無礙解脫淨行解脫普門  
明解脫如來藏解脫隨無礙論解脫入三世

解脫法性藏解脫解脫明解脫離差別解脫  
諸佛子是菩薩十解脫爲首如是等無量無  
邊百千萬億阿僧祇解脫皆於此地得百千  
萬無量阿僧祇三昧百千萬無量阿僧祇陀  
羅尼百千萬無量阿僧祇神通亦復如是是  
菩薩成就如是智慧隨順於菩提成就無量  
念力能於一念頃至十方無量佛所受無量  
法明無量法雨皆能受持譬如娑伽羅龍王  
所澍大雨唯除大海餘地不能堪受諸佛子  
菩薩摩訶薩亦如是受大法雨故能入如來  
密處是大法雨一切衆生聲聞辟支佛皆不  
能受從初地乃至九地菩薩亦不能受持唯  
此菩薩摩訶薩住法雲地悉能受持諸佛子  
譬如大海一龍王起大雲雨皆能堪受若二  
龍王三四五十二三十四十五十若百龍

王若干若萬若億若百億若干萬億那由他  
龍王乃至無量無邊大龍王起雲所雨一時  
澍下皆能受持所以者何大海是無量器故  
諸佛子菩薩摩訶薩亦是住法雲地於一  
佛所能受大法明雨二佛三四五十百千萬  
億乃至無量無邊不可稱五不可說十九無有限過  
諸算數於一念中皆能堪受如是諸佛大法  
雲雨是故此地名法雲地問言佛子是菩薩  
於一念中為能堪受幾所佛法明大雨答言  
不可以算數所知但以譬喻可說諸佛子譬  
如十方所有不可說百千萬億那由他世界  
中微塵爾所微塵世界中衆生假使皆得聞  
持陀羅尼為佛侍者為大聲聞多聞第一譬  
如金剛蓮華上佛有大擇比丘多聞第一其  
一衆生成就如是多聞之力餘若干衆生皆

亦如是其一人所受法第二人不重受如是  
一切各各不同諸佛子於意云何是一切衆  
生受持多聞力為多不答言無量問言諸佛  
子我今當為汝說是菩薩住此法雲地於一  
念一時於一佛所能堪受三世法性藏名曰  
大法明雨上一切衆生多聞之力比此百分  
不及一百分萬分千萬億那由他乃至算數  
譬喻所不能及如一佛所聞十方若干世界  
所有微塵諸佛皆能堪受大法明雨復能過  
此無量無邊於一念一時悉能堪受大法明  
雨是故名為法雲地

十住經卷第五

音釋

朱昌朱切  
女美好也  
膝脛節也  
妓奇寄切  
女樂也  
澍之戍切  
森汪水

十住經卷第六

體六

姚秦三藏法師鳩摩羅什共佛陀耶舍譯

法雲地第十下

復次佛子菩薩摩訶薩住是大法雲地自從願力生大慈悲放大法雷音諸通明無畏以為電光發大智慧以為疾風大福德善根以為密雲現種種身色為雜色雲說法降魔以為雷音一念一時能於上所說微塵世界皆悉周普無有遺餘復過此數以兩善法甘露法雨故滅衆生隨心所樂無明所起煩惱塵炎是故名為法雲地復次諸佛子菩薩摩訶薩住是法雲地於一世界中從兜率天上來下乃至示大涅槃一切佛事隨所度衆生皆現神力若二三千世界乃至如上微塵數世界又復過是百千萬億阿僧祇世界從兜率

來下乃至示大涅槃一切佛事隨所度衆生皆現神力是菩薩住在此地於智慧中得上自在力善擇大智慧或以狹國為廣廣國為狹或以垢國為淨淨國為垢如是一切世間性皆有神力是菩薩或於一微塵中有一三千大千世界鐵圍山川而不迫隘或二三四五十二三十四十五十若百若千萬億無量不可說不可說世界諸莊嚴事皆示入微塵若以一世界莊嚴事示不可說不可說世界或以乃至不可說不可說世界衆生置一世界中亦不迫隘或以一世界衆生置不可說不可說世界中或以不可說不可說世界示著一毛頭而不惱衆生或於一毛中示一切佛神通力莊嚴之事或以十方所有不可說不可說世界微塵於一念中現如是等

身於一身中示若干無量手以此手勤心供養十方諸佛以一一手捉恒河沙等蓮華聚以散諸佛塗香雜香末香衣服幡蓋寶物亦復如是一切莊嚴之具皆以手執供養諸佛於一一身皆亦如是又一一身化有爾所塵數頭於一一頭有爾所塵數舌以是神力讚歎諸佛如是等事於念念中徧滿十方於念念中以神通力無量世界示得佛道轉於法輪乃至大般涅槃於三世中以神通力示現無量身於自身中現有無量無邊佛土莊嚴事於自身中示一切世界成壞事或令一切諸風皆於一毛孔出而不惱衆生或欲以無量無邊世界爲一海水此海水中作大蓮華形色光明徧無量無邊世界於中示得菩提莊嚴妙事乃至示得一切種智自身中所有

一切光明摩尼寶珠電光日月星宿諸光明乃至十方世界所有光明諸物皆於身中現以口噓氣能令一切十方無量無邊世界震動而不令衆生有驚畏想示十方世界水劫盡風劫盡火劫盡而衆生身隨意莊嚴或欲於自身示作如來身如來身作自身如來身作已佛國已佛國作如來身諸佛子菩薩摩訶薩在此菩薩法雲地神變如是又餘無量神力自在奇異示現爾時會中有諸菩薩天龍夜叉乾闥婆阿脩羅迦樓羅緊那羅摩睺羅伽釋提桓因梵天王四天王自在天子淨居天等各作是念若菩薩神通自在智慧力如是無量無邊佛復云何爾時解脫月菩薩摩訶薩知大衆心所念問金剛藏菩薩言佛子今諸大衆皆有所疑聞是菩薩大神通智

慧力隨在疑網汝今當斷一切疑惑示菩薩神通莊嚴妙事即時金剛藏菩薩入一切佛國體性三昧時諸大衆天龍夜叉乾闥婆阿脩羅迦樓羅緊那羅摩睺羅伽釋提桓因梵天王護世天王自在天子淨居天等大衆皆自見知入金剛藏菩薩身中於其身內見有三千大千世界莊嚴衆事若滿一劫說不可盡於中見佛道場樹其莖周圍十萬三千大千世界高百萬三千大千世界覆蔭三千億三千大千世界稱樹高廣有師子座其座上有佛號一切智王如來一切大衆咸皆見佛坐在座上其中所有莊嚴上妙供養之具滿一劫說亦不可盡金剛藏菩薩示現如是大神力已還令大衆各在本處爾時一切衆會主希有想默然一心觀金剛藏菩薩爾時解

脫月菩薩問金剛藏菩薩言佛子甚為希有是三昧有大勢力是三昧者名為何等答言是三昧者名為一切佛國體性三昧問言是三昧所有勢力為齊幾所答言佛子若菩薩摩訶薩善修成是三昧力者能以如是無量恒河沙世界微塵數三千大千世界於身中現復過是數佛子菩薩摩訶薩在此法雲地得如是諸菩薩三昧無量無邊百千萬億以是故此菩薩住是地中身身業難可測知口業難可測知意業難可測知神力自在難可測知觀三世法難可測知諸三昧行入難可測知智力難可測知遊戲諸解脫難可測知變化所作神力所作勢力所作難可測知略說乃至舉足下足乃至小王子菩薩住妙善地者不能測知諸佛子菩薩法雲地如

是無量今已略說若廣說者無量無邊阿僧祇劫不能得盡問言佛子若菩薩行處力神通力如是者佛行處力神通力復云何答言佛子譬如有人取四天下中二三塊土作是言無邊世界地性爲多此耶汝所問者我謂如是如來無量智慧云何以菩薩智慧而欲測量諸佛子如人取四天下中少地性餘在極多諸菩薩法雲地於無量劫但可說聞何況如來地諸佛子我今略說令汝知之佛現在爲證如一一方無量無邊世界微塵等諸佛世界十地菩薩皆滿其中譬如稻麻叢林是諸菩薩有無量無邊業修習菩薩功德智慧禪定於如來功德智慧力百分不及一億千萬億分不及一乃至算數譬喻所不能及諸佛子是菩薩隨如是智慧順如來身口意

亦不捨諸菩薩三昧而勤心供養諸佛於一劫以一切麤現供養具供養無量無邊諸佛而能具受諸佛神力轉復明勝是菩薩於法性問難無能勝者乃至無量無邊百千萬億劫不可窮盡佛子譬如大金師善治此金爲莊嚴物以無上摩尼寶珠間錯其中安置自在天王頸上其餘諸天無能奪者又諸天人莊嚴之具無能及者諸佛子菩薩住十地中智慧功德善根從初地至九地諸菩薩摩訶薩所不能及菩薩住是地中得大智照明故能隨順一切智慧其餘智慧之明所不能壞佛子譬如大自在天王光明一切生處衆生光明所不能及能令衆生身心涼冷諸佛子菩薩摩訶薩亦如是住是法雲地中智慧光明一切聲聞辟支佛所不能及從初地乃

至九地菩薩摩訶薩亦不能及是菩薩住是地中能令無量衆生住一切智道諸佛子菩薩摩訶薩住是地中諸十方佛爲說智慧令通達三世正知法性相以智普覆一切世間性照一切世間性大悲大慈普覆一切衆生正徧見知一切諸法舉要言之具足爲說至一切智道佛子是名菩薩摩訶薩第十菩薩法雲地菩薩摩訶薩住是地中多作摩醯首羅天王智慧明達善說聲聞辟支佛菩薩波羅蜜於法性中有問難者無能令盡所作善業若布施若愛語若利益若同事皆不離念佛念法念菩薩伴念菩薩行念諸波羅蜜念諸地行不離念十力念無所畏念不共法乃至不離念具足一切種智常作是念我當何時於衆生中爲首爲勝爲大爲妙爲上爲無

上爲導爲將爲帥爲尊乃至於一切衆生中爲依止者若欲如是勤行精進於一念中得無量百千萬億那由他不可說不可說世界微塵數三昧乃至亦爾所微塵數菩薩眷屬若以願力神通自在復過是數所謂諸行上妙供具信解起業若身若口若光明若諸根若如意若音聲若行處乃至若干百千萬億劫不可稱數諸佛子是名菩薩摩訶薩地次第順行趣向一切種智佛子譬如從阿耨達池四河流出滿足四天下轉增無有窮盡乃入大海諸佛子菩薩摩訶薩亦如是從菩薩出於善根大願之水以四攝法滿足衆生而不窮盡轉更增長乃至一切種智諸佛子是諸菩薩十地因佛智故而有差別譬如因大地故有十大山王何等爲十所謂雪山王香

山王軻梨羅山王仙聖山王由乾陀羅山王  
馬耳山王尼民陀羅山王所迦婆羅山王衆  
相山王須彌山王佛子如雪山王一切藥草  
集在其中取不可盡諸佛子菩薩摩訶薩亦  
如是住在菩薩歡喜地一切世間經書技藝  
文頌呪術集在其中無有窮盡諸佛子如香  
山王一切諸香聚在其中而不可盡菩薩摩  
訶薩亦如是住菩薩離垢地中持戒頭陀威  
儀助法集在其中無有窮盡如軻梨羅伽山  
王但以寶成集諸妙華取不可盡諸佛子菩  
薩亦如是住於明地集一切世間禪定神通  
解脫三昧問不可盡諸佛子如仙聖山王但  
以寶成多有五神通聖人不可窮盡菩薩摩  
訶薩亦如是住菩薩炎慧地中集令衆生入  
道因緣種種問難不可窮盡諸佛子如由乾

陀羅山王但以寶成集夜叉大神夜叉羅刹  
衆生不可窮盡諸佛子菩薩亦如是住菩薩  
難勝地中集一切自在如意神通說不可盡  
諸佛子如馬耳山王但以寶成集衆妙果取  
不可盡諸佛子菩薩摩訶薩亦如是住現前  
地中集深因緣法說聲聞果不可窮盡諸佛  
子如尼民陀羅山王但以寶成集諸一切大  
力龍神不可窮盡諸佛子菩薩摩訶薩亦如  
是住菩薩遠行地中集種種方便智慧說辟  
支佛道不可窮盡諸佛子如所迦婆羅山王  
但以寶成集心自在者不可窮盡諸佛子菩  
薩摩訶薩亦如是住無動地集一切菩薩自  
在道說世間性不可窮盡諸佛子如衆相山  
王但以寶成集大神力諸阿脩羅無有窮盡  
諸佛子菩薩亦如是住菩薩妙善地中集轉

衆生行智說世間相不可窮盡諸佛子如須彌山王但以寶成集諸天神無有窮盡諸佛子菩薩亦如是住法雲地中集如來十力四無所畏說諸佛法不可窮盡諸佛子是十寶山同在大海因大海水有差別相諸菩薩摩訶薩十地亦如是同在佛智因一切智故有差別相諸佛子譬如大海以十相故數名大海無有能壞何等爲十一漸次深二不共死屍宿三餘水失本名四一味五多寶聚六極深難入七廣大無量八多有大身衆生依住九不過常限十能受一切大雨無有盈溢諸佛子諸菩薩行亦如是以十因緣故得名無有能壞何等爲十歡喜地中漸次生堅固願離垢地中不與破戒者共宿明地中捨諸世間假名炎慧地中於佛所得一心不壞信淨

難勝地中生世間無量方便神通起世間事現前地中觀甚深因緣法遠行地中以大廣心善擇諸法無動地中能起大莊嚴事示現妙善地中能得深解脫通達世間行如實不過法雲地中能受一切諸佛大法明兩諸佛子譬如大摩尼寶珠有十事能與衆生一切寶物何等爲十一出大海二巧匠加治三轉精細四除其垢穢五以火鍊治六衆寶莊嚴七貫以寶縷八置在瑠璃高柱九光明四照十隨王意兩衆寶物諸佛子菩薩摩訶薩發菩提心寶亦有十事何等爲十一初發心布施離慳二修持戒頭陀苦行三以諸禪定解脫三昧令轉精妙四以道行清淨五鍊以方便神通六以深因緣法莊嚴七以種種深方便智慧貫穿八置以神通自在幢上九觀衆

生行放多聞智慧光明十諸佛授智職爾時於一切衆生能爲佛事墮在薩婆若數諸佛子是諸菩薩所行集一切智慧功德法門品若不深種善根者不能得聞問言若得聞者是人爲得幾許福答言隨諸佛所有智慧勢力如是發薩婆若心所緣攝福德是人得聞此法門所得福德亦復如是何以故若無菩薩心聞是法門不能信解受持何況以身修習能成是事諸佛子以是故當知是人隨順一切種智得聞信解受持修行說是經時以佛神力十方世界十億佛國微塵數世界六種十八相動又法應震動諸天雨華如雲而下雨諸香瓔珞天寶衣天幡蓋天寶物天莊嚴身具雨天妓樂歌頌而下更有大音讚歎十地殊勝之事此他化自在天王宮四天下

中如是十方一切世界周徧皆說十地經以佛神力故十方過十億佛國微塵數世界有十億佛國微塵數諸菩薩來徧滿十方虛空皆作是言善哉善哉金剛藏佛子善說諸菩薩摩訶薩住諸地相佛子我等皆亦名金剛藏從金剛德世界金剛幢佛所來所經歷處皆說是經衆會亦如是言辭亦如是義趣亦如是不增不減佛子我等以佛力故到此大衆來證是事諸佛子如我等來至此衆如是十方一切世界一一世間種性四天下他化自在天王宮摩尼寶殿皆有十億佛國微塵數菩薩徃爲作證爾時金剛藏菩薩觀察十方觀一切大衆觀深法性讚歎助發薩婆若心示衆生菩薩大力欲淨諸菩薩行攝一切衆生隨順薩婆若除一切世間之垢與諸

衆生一切種智因緣示不可思議智慧莊嚴  
妙事說一切菩薩功德差別相欲令此義轉  
勝明顯示衆生故承佛神力而說偈言

諸菩薩所行 樂於善寂滅 其心無所着  
猶若如虛空 除貪恚癡垢 安住道智中

如是無上行 願樂欲聽聞 如是諸菩薩

在於無量劫 勤心常修習 萬億種善根

供養無量佛 辟支阿羅漢 爲利衆生故

乃生菩提心 精進持戒行 頭陀除罪垢

修善忍轉妙 慚愧威德滿 福慧因緣故

高勝心明淨 深樂於佛智 同佛生菩提

供養於一切 十方三世佛 如虛空等國

悉皆令清淨 一切法平等 善悉通達故

爲度一切衆 生於菩提心 諸菩薩如是

生是無量心 至於歡喜地 息惡樂布施

得諸本願力 慈悲心偏多 深行十善道

能到離垢地 戒聞功德富 慈心愍世間

永離諸垢穢 深心常清淨 普觀諸世間

三毒火熾然 如是之大士 能入三空地

觀三界皆空 無常亦如病 如癰如瘡箭

百種苦常然 見諸有爲過 貪著佛功德

得佛智明炎 得入於炎地 成就於念慧

得至道智中 在此地供養 百千種諸佛

常能思惟念 念佛無量德 得入於一切

世間難勝地 能以慧方便 種種而示現

諸有所爲作 以利於世間 供養於諸佛

作益衆生事 無生法在前 得入現前地

菩薩諸所行 一切世難知 常無有我心

離有亦離無 諸法先空寂 十二緣故行

善了此微細 能入遠行地 行慧方便等

得法寂滅相	如是之大士	難知難可及
為欲令世間	得善寂滅故	還起修諸行
種種福德事	普入於衆生	種種心行處
如是能得入	等空不動地	大智諸菩薩
悉善能具行	種種諸智業	得十自在力
能以無有量	無邊限諸身	普現十方界
而為說妙法	善達世間性	及諸衆生性
如是大慈悲	能入妙善地	第一妙淨智
善觀諸世間	縷練煩惱業	深曲險難處
為度是等故	得諸佛法藏	善說第一義
悉無所違錯	如是次第行	具足諸善法
乃至到九地	所修集福德	欲得諸佛力
第一深妙利	乃於一切佛	能得受智職
先得無數定	智行極廣大	末後得難壞
諸智職三昧	若能得如是	一切職三昧

一切寶莊嚴	大蓮華即出	菩薩稱蓮華
現身坐其上	餘華諸菩薩	咸共一心視
爾時大菩薩	從身放無量	百千億光明
滅諸世間苦	然後頂上出	百千億光明
普照十方界	諸佛大衆會	於上虛空中
化成光明網	供養諸佛已	入諸佛足下
時諸一切佛	及諸大菩薩	各知其菩薩
得受於智職	如是一切佛	報以眉間光
名曰一切職	入此菩薩頂	一切無量佛
與此菩薩職	猶如轉輪王	假授太子位
時諸十方界	普皆大震動	乃至阿鼻等
諸苦皆除滅	菩薩為一切	智慧得是職
如是名為到	無上法雲地	住於是地中
智慧無邊限	善知度一切	世間諸因緣
入色無色法	欲色無色界	能知衆生性

國土性法性	又能入可數	不可數法中
乃至能觀擇	虛空無量性	又此地悉具
菩薩變化事	諸佛威神力	微細智密事
又能悉通達	一切諸劫數	於一毛端中
觀見世間性	一切諸如來	於此無上地
初生及出家	得道轉法輪	示入於涅槃
皆隨順於智	寂滅妙解脫	悉於此地得
此地諸大士	憶念力大故	諸佛大法雨
皆悉能受持	譬如大海水	能持龍王雨
諸佛大法雨	菩薩受亦爾	若於一佛所
一時聽受法	十方無量土	微塵數衆生
皆得聞總持	成於聲聞乘	不如是菩薩
算數所不及	大智慧力故	及先大願力
能於一念中	徧滿無量國	雨甘露法水
滅諸煩惱火	是故諸佛名	此地為法雲

大士住此地	供養諸佛具	過諸天所有
普示大神力	示衆轉勝力	過是數無量
若人欲思量	迷悶不能解	大智住此地
舉足下足事	及餘諸菩薩	乃至於九地
皆悉不能知	何況餘衆生	三世諸聲聞
及與辟支佛	住此諸佛示	一切智慧事
亦與令通達	三世無礙智	亦示法性寂
亦示種種變	一切諸世界	所有衆生類
所行一切法	深微隱妙事	一切佛功德
次第示令知	菩薩住此地	能以大供具
供養十方佛	徧滿一切方	一切諸世間
所有衆生類	其餘諸供具	皆所不能及
智者住此地	皆能破一切	無明諸闇冥
開示以佛道	如自在天王	光滅衆熱惱
佛子智光明	滅衆惱亦爾	住是地亦作

三界自在王 通達諸智慧 善以三乘化

能於一念中 得無量三昧 能見十方佛

其數亦如是 金剛藏菩薩 告諸大士言

我今略解說 十地妙行已 若廣演說者

千億劫不盡 是則名清淨 諸大菩薩地

為得佛智故 住於此地中 安住不動移

猶如大山王 初地具一切 經書諸技術

猶如雪山中 積聚眾藥草 持戒及多聞

在於二地中 猶如香山王 集諸一切香

如軻梨羅山 多積諸寶華 明地集聞智

其喻亦如是 炎地多積集 道法寶不壞

如仙聖山中 善寂人不少 五地諸神通

無能得及者 如由乾陀中 夜叉神不少

六地善分別 諸果無窮盡 猶如馬耳山

諸果無有量 七地中大慧 無有能及者

如尼民陀山 諸龍王不少 住於八地中

自在智無量 如斫迦羅山 多心自在者

九地心清淨 說法無障礙 猶如眾相山

阿脩羅不少 十地中諸佛 功德無窮盡

如須彌山王 多諸天神眾 又復初地中

發於廣大願 二地持戒品 三地行功德

第四地專一 五地眾妙事 六地甚深相

七地廣大心 八地中種種 莊嚴諸神通

九地思妙智 能過一切世 十地能受持

諸佛大法雨 菩薩行大海 難動不可盡

發心出世間 得入於初地 二地淨持戒

三地修諸禪 四地道行淨 五練方便慧

六因緣莊嚴 七深方便慧 八到瑠璃幢

九地行眾生 一切險難處 智慧光普照

十地受智職 猶如國王計 如是次第淨

菩提心妙寶 十方諸世界 所有微塵數  
可於一念中 計知其多少 可以一毛頭  
數知於虛空 諸佛大功德 無量不可盡  
說是十住經時 自在天王及諸天衆解脫月  
菩薩及諸菩薩 一切世間皆大歡喜信受奉  
行

十住經卷第六